



P. POMPONATII.

MANTVANII

TRACTATVS

DE IMMORTALITA- TE ANIMAE.



PROEMIUM CONTINENS

intentionem seu libri materiam,

& causam intentionis.



RATER Hieronymus Natalis
Ragusæus ordinis Prædicatorum,
cum aduersa laborarem valetudi-
ne, sicuti est vir humanissimus
nostrique amantissimus ad nos se
frequentius recipiebat, cùmque
quodam die minus me vexari à morbo conspi-
ceret, vultu adeo demisso sic orsus est: Cha-
rissime Præceptor superioribus diebus cum pri-
mum de cælo nobis exponeres, peruenissesque
ad locum illum in quo Aristoteles ingenitum

A

& incorruptibile conuerti pluribus argumentationibus contendit ostendere, dixisti Diui Thomæ Aquinatis positionem de animorum immortalitate, quanquam veram & in se firmissimam nullo pacto ambigeres, Aristotelis tamen dictis minimè consonare censebas; Ea propter nisi tibi molestum esset à te duo intelligere maximè desiderarem; primum scilicet quid reuelationibus & miraculis semotis, persistendoque purè infra limites naturales hac in re sentis, alterum verò quamnam sententiam Aristotelis in eadem materia fuisse censes? At ego cum omnium ibi astantium idem maximum desiderium conspicerem (etenim multi aderant) sic tunc ipse respondi, Dilectissime Fili, vosque ceteri, etsi non parùm petis, altissimum enim huius negotium est, cum omnes, ferè illustres Philosophi in hoc laborauerunt; quoniam tamen nonnisi rem quā possum quid scilicet existimem postulas, facile etenim est hoc tibi aperire, imò libenti animo tibi morem geram; ceterum verò an ita se habeat res vt existimo peritiores consules: Rem igitur Deo duce aggrediar.

*In quo ostenditur hominem esse ancipitis
naturæ, mediumque inter mortalia
& immortalia.*

CAPVT I.

INitium autem considerationis nostræ hinc
sumendum duxi, hominem scilicet non sim-
plicis sed multiplicis, non certæ sed ancipitis na-
turæ esse, mediúmque inter mortalia & immor-
talia collocari; hoc autem videre apertum est;
si eius essentielles operationes ex quibus essentiæ
notificantur inspexerimus, eo etenim quòd ve-
getatiuæ & sensitiuæ opera exercet, quæ vt 2.
de anima, & 2. de gener. anim. cap. 3. traditur,
sine instrumento corporali caducòque exerce-
ri non possunt, mortalitatem induit; eo autem
quod intelligit & vult, quæ operationes vt per
totum librum de anima & 1. de part. anim.
cap. 1. & 2. de gener. anim. cap. 3. ha-
betur, sine instrumento corporali exercen-
tur, & separabilitatem, immaterialitatem, &
immortalitatem arguunt, inter immortalia cõ-
munerandus est: ex quibus tota colligi potest
conclusio, non simplicis scilicet naturæ esse,
cum tres animas vt serè ita dixerim includat, ve-
getatiuam videlicet, sensitiuam, & intellectu-
uam, ancipitemque naturam sibi vindicare; cū
neque simpliciter mortalis, neque simpliciter
immortalis existat, verùm vtramque naturam

A ij

De Immortalitate

amplectatur : Quapropter bene enunciauerunt antiqui, cum ipsum inter æterna & temporalia statuerunt, ob eam causam quòd neque purè æternus, neque purè temporalis sit, cum de vtraque natura participet, ipsique sic in medio existenti data est potestas vtram velit naturam induat; quo factum est vt tres modi hominum inueniantur, quidam namque inter Deos connumerati sunt licet perpauci; & hi sunt qui subigitur vegetatiua & sensitiua quasi toti rationales effecti sunt; quidam vero ex toto neglecto intellectu, solisque vegetatiuæ & sensitiuæ incumbentes quasi in bestias transmigrauerunt; & hoc fortassis voluit Apologus Pythagoræ cum dixit animas humanas in diuersas bestias transire; quidam verò puri homines nuncupati sunt, & hi sunt qui mediocriter secundùm virtutes morales vixerunt, non tamè ex toto intellectui incumbere, neque prorsus virtutibus corporeis vacuere; horum tamen modorum vnusquisque magnam habet latitudinem, sicuti videre apertum est, huic etiam consonat quod in psalmo dicitur, minuiisti eum paulò minùs ab Angelis.

In quo ponuntur modi, quibus dicta multiplicitas humanæ naturæ intelligi potest.

CAPVT II.

Visa itaque multiplicitate ancipitiq[ue] hominis natura, non ea quidem quæ ex compositione materiæ & formæ resultat, sed ea quæ ex parte ipsius formæ seu animæ; videndum restat cum immortale & mortale opposita sint quæ de eodem affirmari nequeunt, merito qui ambiget quomodo fieri possit vt hæc simul de anima humana dicantur: etenim hoc videtur non leue: Quare vel vna & eadem natura statuëtur, quæ simul mortalis & immortalis sit aut altera & altera; quòd si secundum detur, hoc tribus modis intelligi poterit; aut igitur secundum numerum hominum erit numerus mortalium & immortalium, vt pote in Socrate erit vna immortalis & vna aut duæ mortales, & sic de cæteris, sic quòd vnusquisque propriam mortalem & immortalem habeat; Aut potiùs in omnibus hominibus vna tantum statuëtur immortalis, secundum vnumquemque autem hominem mortales sunt distributæ & multiplicatæ, an magis è conuerso immortalem multiplicatam, mortalem verò omnibus communem ponemus; si verò altera pars magis eligatur, videb[er]et quòd per vnā & eandem homo sit mor-

talís & immortalis, cum fieri non posse videatur quòd opposita de eodem dicantur, simpliciter fieri nequit vt eadem sit mortalis & immortalis, verùm vel simpliciter erit immortalis & secundùm quid mortalis, aut potius viceuersa simpliciter mortalis & secundùm quid immortalis, an magis vtrumque secundùm quid amplexa est, scilicet secundùm quid mortalis & secundùm quid immortalis: his etenim tribus modis satis contradictio euitari poterit: Colligenti ergo sex modis istud imaginari poterit, veluti discurrenti & colligenti appareat.

In quo ponitur modus affirmans animum immortalem esse vnum numero, mortalem verò esse multiplicatum, quem modum Themistius & Auerroes insequuti sunt.

CAPVT. III.

EX istis igitur sex modis enumeratis quatuor acceperunt iudices, duo verò euauerunt; nullus enim posuit immaterialem multiplicari, materialem verò esse vnum numero, & hoc rationabiliter, quoniam inimaginabile est vnam rem corpoream esse in tot distinctis loco & subiecto, & maximè si est corruptibilis: Similiter nullus posuit eandem rem æqualiter esse morta-

lem & immortalem, sicuti nihil æqualiter potest constitui ex duobus contrarijs, sed semper oportet vnum alteri prædominari, vt ostenditur 1. de cælo tex. comm. 7. & 2. de gener. 47. & 10. metaph. 23. Sigillatim igitur de illis quatuor residuis.

Auerroes itaque, & vt existimo ante eum Themistius concordēs posuere animam intellectuam realiter distinguī ab anima corruptibili verū ipsam esse vnā numero in omnibus hominibus, mortalem verò multiplicatam.

Primi autem dicti ratio est, quoniam cum viderunt Aristotelem simpliciter probare intellectū possibilem esse inmixtum & immaterialem, & per consequens æternum, omniaque eius verba ad hoc tendere vt inspicienti libros de anima liquet, crediderūtq; rationē Aristotelis in se veram esse, affirmauerunt simpliciter intellectum esse immortalem; cum autem vterius viderunt animā sensitiuam & vegetatiuā de necessitate in suis officijs organo corporeo indigere, vt ex locis superius citatis apparet, tale autem de necessitate corporeum & caducū est, concluderunt talē animā simpliciter esse mortālē: verū cū fieri nequeat vt eadem res simpliciter & absolutē mortalis & immortalis sit, coacti sunt ponere immortalē à mortali realiter distinguī; Themistius quoque in hanc sententiam trahere conatur Platonem, inducītq; verba Platonis in Timæo quæ manifestē videntur hoc prætere: Quod vero vnicus sit intellectus in omnibus hominibus siue possibilis ponatur, patere potest ex eo quoniam

De Immortalitate

apud Peripateticos est celebrata propositio, multiplicationem indiuiduorum in eadem specie non posse esse nisi per materiam quantam, vt dicitur 7. & 12. metaph. & 2. de anima: Quo autem modo soluantur dubitationes contra hunc modum, apparet eorum libros, & suorum sectatorum intuendo: hic enim intendimus abbreviare, solúmque referre quæ necessaria sunt.

In quo dicta opinio Averrois
impugnatur.

CAPVT IV.

Quamuis hæc opinio tempestate nostra sit multum celebrata, & fere ab omnibus pro cōstanti habeatur eam esse Aristotelis, mihi tamē videtur quod nedum in se sit falsissima, verū inintelligibilis, & monstruosa, & ab Aristotele prorsus aliena; imò existimo quod tanta fatuitas nunquā fuerit nedum credita, verū excogitata: Et primò quidē de eius falsitate nihil noui in tēdo adducere, sed tātūm lēctore remittere ad ea quæ latinorū decus pīus Thomas Aquinas, & in libro proprio contra vnitatē intellectus, & in part. summa & li. 2. cōtra Gentiles, & in quæstionibus disputatis de anima, & in multis alijs locis scribit; etenim tā aculēter, tā subtiliter aduersus hanc opinionem inuehitur, vt sententia mea ni-

hil intactum, nullamque responsionem quam quis pro Auerroe adducere potest impugnata relinquat; totum enim impugnat, dissipat, & annihilat, nullumque Auerroistis refugium relictum est, nisi conuitia & maledicta in Diuinum & Sanctissimum virum: sed quoad secundum hæc paucula quæ mihi plenam fidem faciunt adducere statui, videlicet hoc alienum esse ab Aristotele, verum hoc esse figmentum, & monstrum ab Auerroe confictum.

Primò quoniam talis anima intellectiua, vel habet aliquam operationem omninò independentem à corpore tanquam à subiecto & obiecto, vel nullam; secundum dici non potest, cum sibi repugnet & rationi, sibi quidem, quoniam comm. 12. lib. 1. de anima in fine hæc dicit, & non intendit per hoc id quod apparet ex hoc sermone superficie tenus, scilicet quod intelligere non sit nisi cum imaginatione, tunc enim intellectus materialis erit generabilis & corruptibilis sicut intelligit Alexander: Ex quibus liquet quod intellectus secundum Auerroem habet aliquam operationem omnino independentem à corpore: Ratione etiam illud firmatur, quoniam intellectus non est forma constituta in esse per subiectum; Ergo non dependens à subiecto in esse; Ergo neque in operari, cum operatio sequatur esse: verum quod hoc Aristoteli non consonet eiusque sententiæ contrarietur satis patet, cum Aristoteles in fine citati textus 12. lib. 1. de anima dicat, intelligere aut esse phantasiam aut non esse sine phantasia: &

quamuis ibi conditionaliter loquatur, tamen 3. de anima tex. 39. clarissimè dicit, quòd non est intelligere absque phantasmate, quod ex experimento comprobatur, nullo igitur modo intellectus humanus secundum Aristotelem habet operationem prorsus à corpore independentem, quod est oppositum concessi.

Ad hoc nò video aliam responsionem nisi quòd argumentum ostendit de intelligere humano, & quatenus per eum intellectum homo dicitur intelligens; sic enim verificatur quòd semper indiget phantasmate; in intellectiōe enim noua, & ante adeptionem illud manifestum est; in intellectiōe verò æterna, siue in ipsa adeptione illud etiam veritatem tenet, cum secundum ipsum intellectus possibilis disponatur ad susceptionem intellectus agentis tanquam formæ per habitus speculatiuos qui dependent in conseruari à virtute sensitiua, vt ipse dicit 3. de anima comm. 39. verum si secundum se sumatur intellectus nequaquam à phantasmate dependet.

Quamuis autem istud satis ingeniosè dicatur, nihil tamen videtur proficere, quoniam secundum communem definitionem animæ, anima est actus corporis physici organici &c. Ergo anima intellectiua est actus corporis physici organici; cum itaque secundum esse intellectus sit actus corporis physici organici, ergo & in omni suo opere dependebit ab organo, aut tanquam subiecto, aut tanquam obiecto; nunquam ergo totaliter absoluetur ab organo.

Hinc fortè dicitur quòd ita est de anima, si-

cut & de cæteris intelligentijs; etenim Commē-
tator ipse comm. 19. lib. 3. de anima ponit ip-
sam esse vltimam intelligentiarum : Cateræ au-
tem intelligentiæ dupliciter considerari possunt;
vno modo in se, & non vt actuant corpus cœ-
leste, & sic non sunt animæ, habentque opera-
tiones nullo modò à corpore dependentes, sicut
intelligere & desiderare, alio autem modo con-
siderari possunt, vt actuant corpora cœlestia, &
sic conuenit eis esse animas, imò & data defini-
tio de anima eis conuenit, sic enim sunt actus
corporis physici organici, licet satis æquiuocè
illa definitio dicatur. vt ipsemet Commentator
dicit commen. 5. lib. 3. de anima; sunt enim
corpora cœlestia animalia, vt 8. de Physico au-
ditu. 2. de cœlo. & 12. metaph. ponit Aristote-
les, licet satis æquiuocè, sicut & ipse commen-
tator dicit libro de substantia orbis: Quare &
anima intellectiua duobus etiam modis cōside-
rari poterit; vno enim modo vt est infima intel-
ligentiarum, & non in ordine ad suam sphæram
scilicet hominem, & sic nullo modo dependet
à corpore, neque in esse, neque in operari, qua-
re neque vt sic est actus corporis physici orga-
nici; Alio autem modo considerari potest in
ordine ad suam sphæram, & sic est actus cor-
poris physici organici, quare non absoluitur à
corpore vt sic, neque in esse, neque in operari:
Quapropter vt est forma hominis semper indi-
get phantasmate in operari, sed non simpliciter
vt supra; & secundùm istum modum solui po-
test vñitata dubitatio, scilicet quomodo de ani-

ma intellectiua considerat naturalis ; cum tamen 1. de part. cap. 1. dicat non spectare ad naturalem de intellectiua , cum sit mouens non mota , & reliqua quæ ibi dicuntur ; soluitur (inquam) quoniam qua anima est , naturalis est , imò secundum hanc considerationem considerantur intelligentiæ à naturali , qua verò anima humana est intellectus , metaphysici negotij est , sicut & cæteri intellectus superiores.

Sed reuera hæc responsio multipliciter videtur deficere ; in primis quidem , quoniam si idem iudicium esset de anima humana quod & de cæteris intelligentijs , quando 2. metaph. Aristoteles tractationem facit de intelligentijs , & de humana anima pertractare debuisset , quod tamen minimè fecit : præterea si idem est iudicium de humano intellectu quod & de intelligentijs , cur igitur Aristoteles 2. phys. tex. 26. ponit terminum considerationis naturalis animam humanam , quoniam si intelligat Aristoteles quantum ad quia est , falsum est , etenim quia est Dei & intelligentiarum naturalis demonstrat , & per ipsum Commentatorem lib. 1. de anima comm. 2. & 12. metaph. comm. 36. Diuinus hæc accipit à naturali ; Si verò loquatur quantum ad quid est , satis patet secundum responsionem datam non pertinere ad naturalem , cum vt sic sit mouens non motum , imò vt dicit responsio hoc voluit Aristoteles 1. de part. cap. citato : Amplius , ridiculum videtur dicere animam intellectiuam quæ est vna potentia numero duos habere modos intelligendi , scilicet & dependentem & independentem à corpore : sic

enim duo esse videtur habere; Etenim intelligentia etsi sit intellectus, & anima, & in suo intelligere non indiget corpore, in mouendo autem indiget corpore, verum localiter mouere & intelligere sunt operationes valde diuersæ, in anima autem ponuntur intellectiones quarum vna dependet à corpore, altera verò est simpliciter absoluta, quod non videtur consonum rationi, cum vnius operationis respectu vnius & eiusdem non videatur esse nisi vnus modus operandi: Præterea superfluum videtur & incredibile quòd vnum numero habeat infinitas ferè operationes respectu eiusdem obiecti simul, hoc autem sequitur secundum opinionem, quia ille intellectus intellectione æterna intelligit Deum, & intellectione noua tot habet intellectiones respectu Dei quot homines Deum intelligunt. Hoc autem videtur esse purum signum vt ex multis apparere potest, verum si intelligentia intelligat sine corpore, non moueat autem localiter sine corpore, nullum sequitur, cum intelligere & localiter mouere sint operationes valde diuersorum generum, vnàque sit immanens & altera transiens, cum totum oppositum contingat de anima intellectiua, etenim ambæ & sunt intellectiones, & ambæ operationes immanentes.

Secundò ad principale, quia si secundum Aristotelem anima intellectiua & verè immaterialis vt fingit dictus Commentator, cum istud non sit per se notum, imò maximè dubium, oportet per aliquam euidentiã manifestari;

modò ad inseparabilitatem concludendam sufficit secundùm Aristotelem quòd sit vel virtus organica, vel si non organica saltem quòd sine obiecto corporali non possit exire in opus: dicit enim tex. 12. lib. 1. de anima, quòd siue intellectus sit phantasia, siue non sit sine phantasia non contingit ipsum separari, cum autem separabilitas inseparabilitati opponatur, disiunctiuaque affirmatiua contradicat copulatiua affirmatiua facta de partibus oppositis, si igitur ad inseparabilitatem sufficit alternatiue vel esse in organo tanquam in subiecto vel ab ipso dependere tanquam ab obiecto, igitur ad separabilitatem coniunctim requiritur, neque dependere ab organo tanquam à subiecto, neque tanquam ab obiecto, saltem in aliqua sui operatione, cum autem istud sit de quo est quaestio, quomodo certificabit Auerroes animam esse immortalem, praecipuè cum dicat Aristoteles quòd necesse est intelligentem phantasmata speculari, & quilibet homo hoc experitur in seipso.

Hinc fortassis dicitur quòd illa ratio 3. de anima simpliciter probat animam esse immaterialem, quia recipit omnes formas materiales. Ex quo postea euidenter concluditur quòd habet operationem omninò independentem, cum operatio sequatur esse.

Sed hoc non videtur valere, quia illa ratio Aristotelis supponit quòd intellectus moueatur à corpore, cum dicat intelligere esse sicut sentire, & intellectum possibilem esse virtutem passiuam, inferiusque declarat quòd suum motu:

um est phantasma, sed quod indiget phantasmate est inseparabile à materia per dicta; igitur illa ratio magis probat ipsum esse materialem quàm immaterialem.

Sed adhuc fortè dicitur quòd ex eo quòd intellectus non indiget organo tanquam subiecto, ideo est simpliciter immaterialis, quàm rationem facit immediatè Aristoteles post dictam. Verùm istud non videtur proficere, quia vel sola illa conditio sufficit, vel requiritur alia, scilicet quòd non moueatur à corporeo, si ambæ stat argumentum prius; si illa sola destruitur iudicium Aristotelis, cum ponat ambas esse requisitas.

Sed fortassis adhuc dicitur quòd reuera vna sola requisita est, non indigere enim corpore tanquam subiecto, absolute infert esse potentiam immaterialem & è conuerso, quia tamen cum hoc quòd immaterialis est & habeat aliquam operationem omninò independentem, etenim si immaterialis est aliquam habet independentem & è contra, quoniam tamen quòd ultra independentem ab obiecto, habeat & dependentem, ne fortasse aliquis existimaret ex eo quòd habet aliquam dependentem omnem habeat dependentem; Ideo illud apposuit Aristoteles scilicet quòd si intelligere non esset sine phantasia, sic quòd in omni operatione phantasia indigeret, indubitanter intellectus esset inseparabilis.

Sed istud non videtur posse stare: Primò quoniam Aristoteles superflue apposuisset illam

conditionem, cum altera sit sufficiens ad inferendam conclusionem, quod nefas est tantò ascribere Philosopho: Secundò quia ex eò quòd intellectus in omni suo opere indiget phantasmate infertur quòd ipse sit inseparabilis; hoc non potest esse nisi quia est organicus secundum positionem, dico autem organicus subiectiuè, secundum enim data conuertuntur organicum subiectiuè & virtus materialis cognoscitiua, quare & non organicum subiectiuè & immateriale; dicere ergo indigere semper corpore tanquam subiecto, etsi nihil nouum diceretur cum dixit si intelligere non est sine phantasia, nam esse phantasiam & nunquam esse sine phantasia simpliciter conuertuntur, & vnum declarat alterum; esset ergo simile ac si quis diceret si Socrates non est homo, vel non est animal rationale, non est disciplinabilis, qui sermo quantum sit ridiculus & alienus à maiestate Aristotelis iudicio aliorum relinquo: Amplius quando aliquid habet duas causas veritatis vna ablata & altera remanente non minùs illud romanet vt ex se notum est, cum ad veritatem disiunctiuæ sufficit vnam partem esse veram, sed intellectum inseparabilem esse à materia verificatur, quoniam est phantasia, vel non est sine phantasia, vt patet 1. de anima, remoto igitur quòd sit phantasia, non minùs verificaretur ipsum esse materialè dummodo non esset sine phantasia, sed secundum positionem istud est falsum, quia impossibile est secundum eam intellectum esse

esse inseparabilem & non esse phantasiam, cum apud eam illa conuertantur ; ergo positio ponens organicum subiectiue & materiale conuerti, & pariter opposita eorum scilicet non organicum subiectiue & immateriale conuerti falsa est : Adhuc quodocunque alicui rei duo modi sub disiunctione assignantur , res illa indifferenter potest ab altero illorum separari, aut saltem ab vno illorum ipsa remanente , exempli gratia illiberalitas dupliciter contingit, aut per auaritiam , aut per prodigalitem ; ideo & reperitur illiberalis auarus sine prodigalitate , & illiberalis prodigus sine auaritia , si enim separari non possent , non essent vtique duo modi illiberalitatis , sed aut inuicem coinciderent , aut ambo copulatiue & non disiunctiue necessario concurrerent ad illiberalitatem , etenim si nullus illiberalis esset nisi simul prodigus & auarus esset , non recte diceretur ad illiberalitatem requiri prodigalitem vel auaritiam , sed prodigalitem & auaritiam coniunctas constituere illiberalitatem , si igitur ad inseparabilitatem sufficit ipsam esse phantasiam , vel non sine phantasia ; vel igitur stat ipsam esse inseparabilem sine altera earum conditionum indifferenter , vel saltem determinate ; si primum , ergo stabit quod intellectus non sit sine phantasmate , & tamen non sit phantasia , & per consequens quod semper indigeat corpore tanquam obiecto , & non tanquam subiecto , quod est contra concessa ab aduersario ; si verò detur secundum , videlicet

B

quòd determinatè & non indifferenter, cum fieri nequit vt aliquo indigeat corpore tanquam subiecto & non tanquam obiecto. Ergo stabit quòd indigebit tanquam obiecto, & non tanquam subiecto; Ergo idem quod prius: Amplius secundum positionem, intellectus habet aliquam operationem omnimodè independentem à corpore, cum istud dubium sit, debet per aliquod signum certificari; & non est aliud fingere per quod certificari possit, nisi quòd ipse immaterialis est; verum cum & istud non sit minùs dubium quàm primum, demonstratione eget; Quæritur igitur de medio illo, an est quòd simul neque dependet à corpore tanquam subiecto & obiecto, vel quia solum non dependet à corpore tanquam subiecto; primum dici non potest, tum quia sic esset petitio principij, cum intendentes probare intellectum in aliquo sui opere non dependere à corpore; assumimus quòd ipse immaterialis est, & probantes ipsum esse immaterialem, accipimus quòd in aliquo opere non dependet à corpore; tum etiam quia nullum est tale medium in quo non sumatur intellectum non dependere à corpore vt ab obiecto; prima enim demonstratio 3. de anima probat intellectum esse immaterialem, quia recipit omnes formas materiales, modo cum tale recipere consistit in pati vt ibidem dicit Aristoteles, Ergo mouebitur à re corporali, & sic indigebit tanquam obiecto.

Oto : secunda demonstratio est quòd species intelligibilis non recipitur in organo , sed in ipso intellectu : Ergo idem quod prius cum recipere sit pati. Oportet igitur dicere alterum membrum videlicet medium esse quia non indiget corpore tanquam subiecto , licet tanquam obiecto : Quòd si sic est , unde igitur est quòd Aristoteles attentum faciens auditorem in proemio de anima dixit necessarium esse praeintelligere de suis operationibus , subditque si intelligere est sicut phantasia vel non sine phantasia non contingit ipsam separari : Quare ad concludendam separabilitatem inseparabilitati oppositam , oportet coniunctim sumere neque esse phantasia , & in aliquo sui opere non dependere à phantasia , & per consequens non debere à corpore tanquam subiecto , neque tanquam obiecto saltem in aliquo sui opere , quod est oppositum concessi : hoc iterum sic firmatur , per aduersarium , indigere corpore tanquam subiecto & esse virtutem materiali conuertuntur , sua etiam opposita conuertuntur videlicet non indigere corpore ut subiecto & esse virtutem immaterialem , nam i. post. si affirmatio est causa affirmationis , negatio negationis : Quid igitur Aristoteles ad materialitatem concludendam apposit , præter phantasia , non esse sine phantasia , peccat enim per fallaciam non causæ ut causa , quandoquidem præcisæ causæ materialitatis est non indigere corpore ut

B ij

subiecto: Quod & euidētissimè sic iterum firmatur, quoniam ad immaterialitatem præter non indigentiam corporis vt subiecti, aut necesse est vltra hoc non indigere in aliquo sui opere determinato corpore tanquam obiecto, aut illud non necesse est; secundum dari non potest per concessa quoniam non indigere corpore tanquam subiecto, & in aliquo determinato opere non indigere tanquam obiecto conuertuntur; quare posito vno ponitur reliquum, restat igitur vt immaterialitas copulatiuè vtrumque exigit; Quare cum materialitas immaterialitati contrarietur, ad ipsam immaterialitatem sufficit indigere corpore tanquam subiecto, vel corpore tanquam obiecto; vel igitur separabilia sunt ista, & sic non conuertentur, quod est contra concessa, vel inseparabilia erunt, & sic sub disiunctione non erunt assignanda, quod tamen facit Aristoteles; vltima autem sequela patet, quia quod disiunctiuè enunciatur alternatiuè verificatur & non copulatiuè, nam 10. metaph. tex. 17. & Et Commentator 3. de cælo comm. 56. & Boëtius lib. de syllogismo hypothetico, dicunt interrogationem & disiunctiuam vanam & ridiculam esse in quam omnes partes verificantur; & vltra tunc copulatiuæ affirmatiuæ contradiceret copulatiua facta de partibus oppositis, & non disiunctiua quod apertissimè falsum est; quapropter ni fallor Commentator, D. Thomas, & quicumque sentit Aristotelem censere humanum intellectum verè esse immortalem, lon-

gè à vero distat : Præterea mirum est quòd Aristoteles posuerit intellectum aliquando intelligere sine phantasmate, & tamen in omnibus locis dicat quòd non est intelligere sine phantasmate, non enim debuisset tam absolute proferre.

Tertio ad principate, quoniam secundum Commentatorem oportet ponere felicitatem humanam in copulatione intellectus agentis cum possibili, sicut ipse lib. 3. de anima comm. 36. manifeste ostendit : Sed quàm vanum sit hoc & Aristoteli dissonum non difficile est videre; vanum quidem quia inquantum tradunt historiarum nullus vsque ad hæc tempora inuentus : Et sic finis hominis irritus est, cum à nullo attingatur, imo à nullo attingi potest, cum media ordinata ad illum finem haberi non possint ; impossibile est enim aliquem hominem scire omnia vt dicit Plato lib. 10. de Republica, neque etiam speculabilia, imo nulla scientia perfecte habita est vsque ad præsentem diem, vt experimento patet : Quod etiam sit contra Aristotelem manifestum est, quoniam lib. Ethic. vbi determinat de ultimo fine hominis in eo quod homo ponit ipsum in habitu sapientiali : neque quis dicere potest librum illum non fuisse perfectum, cum manifeste in fine libri illius, & epilogat, & se ad librum politicorum continuat : Quare vehementer non possum non imitari, cum ascribat Aristoteli hanc vnitatem intellectus quandoquidem in nullo loco hoc ab eo ponatur ; verùm 2. phys. tex. 26. vbi de

anima humana mentionem facit dicit eas esse multiplicatas, dicit enim sic vsquequo, cuius enim causa vnumquodque, & circa hæc quæ sunt separatae species in materia, homo enim hominem generat ex materia, & sol, vnde manifestum est quod non vnâ solùm sed multas posuit. Aliud etiam est de illa copulatione, cum neque alius repertus est talis, neque Aristoteles aliquid dixerit: Quare mihi videtur cum hoc quod est figmentum in se, sit etiam contra Aristotelem.

In quo ponitur alter modus asserens intellectum realiter distingui à sensitiuo verum numeratum ad numerationem sensitiui.

CAPVT V.

ABiecta igitur priori opinione tanquam intelligibili, est alter modus de enumerationis, conueniens cum primo, quantum ad illud quod intellectuum realiter distinguitur à sensitiuo, quandoquidem contradictoria verè de eodem dici non possunt, verum in altero ab illo distat. Nam secundum numerum sensitiuorum ponit numerum intellectiuorum, Socrates enim distinguitur à Platone vt hic homo ab illo homine, non est autem hic homo nisi per intelle-

Quum ; vt etiam ipse Auerroës fatetur 3. de anima comm. 1. Quare alter est intellectus Socratis ab intellectu Platonis: Etenim si vnus amborum esset intellectus, amborum esset idem esse & operari, sed quid stultius excogitari potest? verum & hi sic conformes inter seipsos diuersificati sunt: Quidam enim ipsorum posuerunt animam magis se habere ad ad hominem vt motor ad motum, quam vt forma ad materiam: Et hæc videtur fuisse mens Platonis in primo Alcibiadis dicentis hominem esse animam vtentem corpore, cui videtur consonare verba Aristotelis 9. Ethic. dicentis hominem esse intellectum: Alij autem oppositum asseruere, dicentes animam se habere ad hominem vt forma ad materiã, & non solum vt motor ad motum, veriusque dicendum hominem esse compositum ex anima & corpore, quam ipsum esse animam vtentem corpore: Cætera autem quæ ab eis adducuntur nostro proposito non sunt necessaria.

In quo prædicta opinio impugnatur.

CAPVT VI.

Hic autem modus secundum vtrumque membrorum à Diuo Thoma in prima parte summa, & in multis alijs locis impugnatur, & mea sententia abundè &

B iiij

manifestè : Si enim homo non componeretur ex anima intellectiua & corpore, velut ex materia & forma, sed ex motore & moto, tunc anima & corpus non maiorem haberent unitatem quàm boues & plaustrum, multaque alia incommoda sequuntur quæ ab eo adducuntur, Ponere autem pluralitatem formarum substantialium in eodem composito, vt asserit secundum membrum, hoc ab Aristotele, & à multis Peripateticis videtur alienum ; verùm duo adducam per quæ omnes superiores modi mihi videntur & à veritate, & ab Aristotele remoti.

Primò quidem hoc videtur experimento contradicere ; ego enim qui hæc scribo multis cruciatibus corporis angustior, quod opus est sensitiuæ ; idemque ego qui crucior discuro per causas medicinales vt refellam hos cruciatus, quod nisi per intellectum fieri non potest ; si igitur altera esset essentia qua sentio, & qua intelligo, quo igitur modo fieri posset vt idem qui sentio sim ille qui intelligo ; sic etenim dicere possemus quòd duo homines simul coniuncti sic mutuas habent cognitiones, quod ridiculum est ; Quod autem huiusmodi opinio sit ab Aristotele remota non difficile est videre ; etenim 2. de anima ponit vegetatiuum in sensitiuo veluti trigonum in tetragono, sed manifestum est trigonum in tetragono non esse tanquam rem realiter ab eo distinctam, scilicet quod est trigonum in potentia est actu tetragonum : Quate cum per Aristotelem eodem modo in mortali-

bus se habeat sensitium ad intellectiuium, sensitium non erit res distincta ab intellectiuo: Qua propter mihi videtur quòd & primus modus Auerrois, & isti duo à vero & ab Aristotele dissonent.

*In quo ponitur modus affirmans mortale
& immortale esse idem re in homine
verum essentiam illam simpliciter esse
immortalem, secundum quid verò
mortalem.*

CAPVT VII.

CUm itaque vniuersaliter rejectus sit modus qui intellectiuium & sensitium in homine distingui realiter existimat, reliquum est vt intellectiuium & sensitium in homine sint idem: Et licet tribus modis vt retro dictum est hoc intelligi possit, duo tamen tantum sunt rationabiles.

Vnus igitur erat quod immortale esset simpliciter in homine, mortale verò secundum quid; & quamuis secundum naturam diuisionis, modus iste in duos posset diuidi, scilicet aut vnum numero in omnibus hominibus, aut multiplicatum ad numerum hominum; quia tamen nullus posuit primum modum, ideo relinqueamus; sed tantum de secundo sermonem

habebimus ; quē et si multi præclarissimi viri sequuti sunt ; quia tamen mihi videtur quod D. Thomas copiosius & magis lucidè ipsum posuit, ideo eius dicta solum referam , vtque ordinatè intelligatur, eius opinionem in quinque dictis colligam.

Primum itaque est quòd intellectuum & sensitivum in homine sunt idem re.

Secundum quod tale verè & simpliciter est immortale , secundum quid verò mortale.

Tertium quòd talis anima verè est forma hominis , & non solum vt motor.

Quartum quòd eadem anima est numerata ad numerationem Individuorum.

Quintum quòd huiusmodi anima incipit esse cum corpore, verum quòd venit deforis, atque à solo Deo producit, non quidem per generationem, sed per creationem ; hæc tamen non desinit esse cum corpore, verum à parte post est perpetua.

Primum horum satis ex superioribus manifestum est ; tum quia plures formæ substantiales non possunt esse in eodem subiecto ; tum quia eadem videtur essentia quæ intelligit, & sentit ; tum quia sensitivum in mortalibus est in intellectu, sicut trigonum in tetragono.

Secundum verò in quo vis omnis consistit, videlicet quod tale verè est immortale, secundum quid tamen mortale, multipliciter declaratur : Primò per rationem Aristotelis 3. de anima, quoniam talis anima est receptiva omnium

formarum materialium; quod autem est cuiusmodi non potest esse materiale, sicut ibidem Aristoteles declarat, cum recipiens debeat esse denudatum à natura rei receptæ; & est etiam propositio concessa à Platone in Timæo, atque ut dicit Auerroës 2. de anima vniuersaliter verificatur in actione reali & spiritali; oculus enim receptivus specierum coloris debet esse abscolor; & sic vniuersaliter de alijs sensibus: Secundo quoniam si intellectus esset materialis forma recepta in eo esset intellecta in potentia, & sic aut non cognosceret aut tantum particulariter cognosceret: Tertiò quia sic esset virtus organica, quare esset determinata ad certum genus entium, vel saltem ad modum singularem; quare vel non omnia cognosceret, vel non cognosceret modo vniuersali. A signo etiam hoc euidenter probatur; nam modus appetendi naturaliter sequitur modum cognoscendi; intellectus autem vniuersale apprehendit quod est æternum, quare & voluntas æternum desiderabit; tale autem desiderium naturale est, cum omnes voluntates hoc appetant; naturalis autem appetitus frustrari non potest, cum 1. de cælo, Deus & natura nihil agunt frustra; quare conuincitur intellectum esse simpliciter immortalem. Verba etiam Aristotelis sunt ad eò lucida pro hac parte ut interprete non indigeant, cum 1. 2. & 3. de anima ponat intellectum esse separatum, & nullius corporis actum; in parte quoque qua agitur de intellectu agente dicit quod intellectus agens verè est immaterialis, quia possibilis est

huiusmodi, & agens præstantius est patiente; idem quoque 1. de part. cap. 1. & 2. de gener. anim. cap. 3. affirmat : Quod vero huiusmodi anima secundum quid mortalis sit ex duobus manifestari potest ; primò quia hæc intellectiua, & sensitiva, & vegetatiua est, vt ex primo dicto liquet, verùm sensitium & vegetatiuum si ab intellectu separata sint corruptibilia sunt ; quare non secundum se intellectiuum mortale est, sed quia gradum continet qui solitariè sumptus mortalis est : Secundò quia anima humana opera sensitivæ & vegetativæ non exercet nisi caduco instrumento ; non igitur in se mortalis est, sed ratione talis operis & instrumenti.

Tertium dictum scilicet quod sit forma hominis, patet ex vniuersali definitione animæ, cum sit actus corporis physici &c. sitque principium quo intelligimus, vt apertè ibi demonstrat Aristoteles.

Quartum verò sequitur ex tertio ; nam si anima intellectiua est forma qua homo est homo, si vnica in omnibus hominibus esset, omnium hominum idem esset esse & operari, veluti contra Commentatorem monstratum est : Aristoteles etiam 2. phys. tex. 26. expresse ponit eas in numero plurali, quemadmodum retrò dictum est.

Quintum autem videlicet quod ipsa sit facta patet, tum ex 2. phys. tex. 26. cum sol & homo generent hominem, tum quia per tertium dictum est forma qua homo

est homo ; sed 12. metaph. tex. 17. forma
simul incipit esse cum eo cuius est forma ;
tum ex 2. de gener. anim. cap. 3. ubi di-
cit solum intellectum venire de foris : Quod
verò non per generationem fiat ex eo patet ,
quoniam quod per generationē producitur ma-
teriale & caducum est : At iam demonstra-
tum est in secundo dicto ipsam esse immateria-
lem & incorruptibilem : Quod etiam à Deo
solo fiat patet , quoniam cum non sit per
generationem , ergo per creationem ; ve-
rùm solum Deum creare alibi demonstratum
est : Hoc etiam per illud 2. de gener. anim.
patere potest , dicitur enim ibi , solus igitur
intellectus diuinus & immortalis existit :
Quod autem post mortem remaneat cum sit
immortalis manifestum est ; ex dicto quo-
que Aristotelis 12. metaph. tex. 17. liquet,
cum dicat nihil prohibere intellectum post
mortem remanere ; sicque tota positio cla-
ra habetur.

*In quo mouentur dubitationes circa
predictum modum.*

CAPVT. VIII.

DE veritate quidem huius positionis apud me nulla prorsus est ambiguitas, cum Scriptura canonica, quæ quilibet rationi & experimento humano præferenda est, cum à Deo data sit, hanc positionem sanciat: Sed quod apud me vertitur in dubium est, an ista dicta excedant limites naturales, sic quod aliquid vel creditum vel reuelatum præsupponant, & conformia sint dictis Aristotelis, sicut ipse Diuus Thomas enunciat: Verùm cum tanti Dòctoris authoritas apud me summa est, nedum in diuinis, verùm in ipsa Aristotelis via, non ausim contra eum aliquid affirmare; sed tantùm quod dicam per modum dubitantis & non asserentis ponam, fortassisque ab eius doctissimis sectatoribus veritas aperietur: In primo igitur eius dicto non ambigo, scilicet quòd re in homine idem sit sensitium & intellectuum; sed cætera quatuor sunt mihi valde ambigua.

Primò quidem quòd talis essentia secundum se & verè immortalis sit, sed improprie

& secundum quid mortalis ; primò quidem quoniam consimilibus rationibus quibus hanc probat opposita probari potest : Ex eo namque quod talis essentia formas omnes materiales recipit , quia recepta in ea sunt actu intellecta , quod non utitur organo corporeo , quod aternitatem & superna affectat , ideo concludebatur quod ipsa sit immortalis ; sed pariter cum ipsa materialiter operetur ut vegetatiua , non omnes formas recipit ut sensitiua , & eadem organo corporeo utitur , temporalia & caduca affectat , probabitur quod ipsa verè & simpliciter sit mortalis , verum ex ea parte qua intelligit secundum quid erit immortalis , tum quia intellectus non coniunctus materiæ est incorruptibilis , sed materiæ coniunctus est corruptibilis , tum quia in tali opere non fungitur instrumento corporali , sicut etiam ipse dicit quod taliter est per accidens & secundum quid materialis , non enim maior ratio de vno quàm de altero videtur.

Secundò quia cum in ista essentia sint quædam quæ dant ipsam esse mortalem , & quædam immortalem , cum multò plura promoueant ad mortalitatem quàm ad immortalitatem , & 1. & 6. phys. à superabundanti sit denominatio , magis pronuncianda est mortalis quàm immortalis , & nedum pronuncianda , verum & hoc erit ex parte rei : Assumptum autè declaratur : Nam si in homine numerum potentialium cōsideremus , duas tantum inuenimus quæ

attestantur super immortalitatem scilicet intellectum & voluntatem, innumeras vero tum sensitiuæ tum vegetatiuæ quæ omnes attestantur super mortalitatem: Amplius si climata habitabilia conspexerimus, multo plures homines assimilantur feris quàm hominibus; interque climata habitabilia perrarissimos inuenies qui rationales sunt; inter quoque rationales si considerabimus hi simpliciter irracionales nuncupari possunt; verùm appellati sunt rationales in comparatione ad alios maxime bestiales, sicut fertur de mulieribus quod nulla est sapiens nisi in comparatione ad alias maxime fatuas: Amplius si ipsam intellectionem inspexeris maxime eam quæ de Dijs est; quid de Dijs? imo de ipsis naturalibus, & quæ subiacent sensui, adeo obscura, adeoque debilis est, vt veriùs ytraque ignorantia scilicet negationis & dispositionis nuncupanda sit quàm cognitio: Adde quantum modicum temporis apponât circa intellectum, & quamplurimum circa alias potentias, quo fit vt vere huiusmodi essentia corporalis & corruptibilis sit, vixque sit vmbra intellectus; hæc etiam videtur esse causa cur ex tot mille hominibus vix vnus studiosus reperiatur, & deditus intellectuali; causa quidem naturalis est, cum effectus sit naturalis; nam semper sic fuit, licet secundum magis & minùs; Causa (inquam) est quia naturâ homo plus sensualis quàm intellectiuis, plus mortalis quàm immortalis existit; quod etiam apparet, cum multi in definitione

initione hominis posuerunt mortale pro differentia; si (inquam) hæc considerabis magis opposita pars videbitur vero consona quàm illa D. Thomæ.

Tertiò contra eandem arguitur, quia animam esse immortalem non est per se notum; quæritur igitur sicut dicebatur contra Auerroem per quam evidentiam hoc cognoscitur; vel igitur ex eo quòd in suo opere non indiget organo tanquam subiecto præcisè, vel cum alio addito; primum dici non potest per ipsum Aristotelem 1. de anima tex. 12. nam ad inferendam inseparabilitatem sufficit alternatiuè, vel quod sua operatio sit in subiecto, vel quòd in omni sua operatione indigeat corpore tanquam obiecto, cum dicat, si igitur intelligere aut est phantasia, aut non est sine phantasia, non contingit ipsum separari; ergo ad separabilitatem ambæ conditiones requiruntur, quia copulatiua affirmatiua opponitur disiunctiue factæ ex partibus oppositis: Ad sciendum ergo animam esse separabilem oportet quod neque indigeat corpore tanquam subiecto, neque tanquam obiecto, saltem in aliqua sui operatione: sed quomodo hoc sciri potest, cum & Aristoteles dicat, necesse est intelligentem phantasma aliquod speculari; & experimur quoniam semper indigemus phantasmatibus, vt vnusquisque experitur in seipso, & læsio organorum demonstrat, & omnia quæ adducta sunt contra Commentatorem de immortalitate animæ, sunt & contra hanc opinionem, cum in hoc conte-

niant, licet in cæteris differant.

Quartò sic arguitur, si anima humana in omni suo opere dependet ab organo, ipsa est inseparabilis & materialis; sed in omni suo opere dependet ab organo; ergo ipsa materialis est; maior patet 1. de anima dicente Aristotele, si intelligere est phantasia, aut non sine phantasia non contingit ipsam separari; minor autem patet ex definitione vniuersali animæ, scilicet est actus corporis physici organici.

Sed hinc fortè dicitur quod anima humana quantum ad intellectum non est actus corporis organici, cum intellectus nullius corporis sit actus, sed solum quantum ad opera sensitivæ & vegetativæ.

Verùm id videtur non posse stare; in primis, quia sic anima intellectiva non esset anima, cum ut sic non esset actus corporis physici organici, quod est contra Aristotelem ponentem illam esse definitionem communem omni animæ, imò per ipsum Thomam dictam vniucè de omnibus animabus; Secundò quia si anima intellectiva indigeret organo pro ipso sentire, quandiu igitur anima esset, ipsa sentiret, quod manifestè falsum apparet; patet autem consequentia, quia stante definito stant & ea quæ sunt in definitione: Tertio quoniam per ipsum Thomam in prima parte, & in secundo contra Gentiles, ideo intelligentiæ non sunt formæ corporum cælestium, quoniam si sic essent maxime indigerent corpore pro intellectu, sicut anima humana; ergo si anima est actus corporis

organici quantum ad sensationem, hoc est pro sua intellectione : ergo in omni suo intelligere indiget phantasia, sed si sic est, ipsa est materialis : ergo anima intellectiva est materialis.

Sed hinc fortè dicitur quod non oportet animam intellectivam actu semper dependere ab organo, quamvis organum ponatur in eius definitione, sed sufficit quod aptitudine, sicut moveri sursum est definitio levis, quantumcunque leve non semper moveatur sursum, sed sufficit quod moveatur, vel possit moveri.

Sed hæc responsio multipliciter videtur deficere : Primò quia si sola aptitudo sufficeret in definitionibus, tunc dici posset quod aliquid esset homo, & tamen actu non esset animal rationale, sufficeret enim secundum responsionem quod esset aptitudine : Secundò, quoniam diceretur quod si anima aptitudinaliter dependet a phantasia, non minùs ipsa erit inseparabilis & materialis, quamvis semper actu non dependeat.

Ad hæc fortè dicitur quod illa non est definitio vera : sed quædam descriptio seu notificatio : Ad secundum dicitur quod ad inseparabilitatem non sufficit dependere à corpore secundum aptitudinem, quoniam separata existens & immaterialis potest de facto à corpore dependere : si verò actu semper dependeret, sic quod nunquam sine corpore posset existere, utique esset materialis.

Sed nullum istorum dictorum videtur conveniens : Primum quidem quoniam omnes dicunt

illas duas definitiones datas de anima esse datas, vnā per causā formalem, & alterā per materiale, & per vnā demonstrari alterā. Secundum etiā dictum in pluribus videtur deficere. Primò quidem quoniam si anima humana duos habet modos intelligendi, vnum per phantasma, alterum verò sine phantasmate, videtur multū irrationabile quòd substantia immaterialis moueatur à re materiali; nam quantumcumque immaterialē in materiali agat, non videtur tamen actionem conuerti: Quare & etiā apud Theologos dubitatio orta est quomodo animæ cruciari possint ab igne corporeo. Secundò quia si anima separata habet habitudinem ad ipsum corpus, vel ergo reuietur, vel non; si primum tunc oportet redire ad opinionem Democriti ponentis resurrectionem, vel ad Pythagoram ponentem transmigrationem animarum in diuersa animalia, quòd in erratis est impugnatum pro qualibet parte; si verò detur secundum, tunc est contra ordinem naturæ, nam 8. phys. tex. 15. Aristoteles impugnat Anaxagoram ponentem mundum non fuisse per infinitum tempus, & postea incepisse: Natura enim vel vno modo procedit, vel pluribus, quòd si pluribus, ordinatè tamen procedit, sed finiti ad infinitum nullus est ordo neque proportio, quare si finito tēpore anima est coniuncta corpori, infinito autem separata, non stabit ordo naturæ. Tertiò, quia tam diuersi modi essendi, scilicet coniuncta & separata, tam-

que diuersi modi operandi, scilicet per phantasma & sine phantasmate, videntur arguere diuersitatē essentia: Nam hoc modo sublato nulla restat via probandi diuersitatem specificā inter aliqua: etenim 6. de hist. anim. ca. 24. dicit Aristoteles mulas quę in Syria pariunt quanquam valde similes sint nostris vt vix discerni possint, non tamen esse eiusdem generis propter tam diuersū modum generationis habere, videturque per totum librum de animalibus asserere quod genita ex putredine & ex semine non sint eiusdē rationis, sicut etiam affirmat Auerroës, idēque Auerroës in fine de somno & vigilia dicit, quod si qui essent homines qui non eodē modo cognoscerent sicut nos, non essent eiusdē generis nobiscum: Alterū etiam dictum videlicet quod si anima semper esset coniūcta phantasmati, esset materialis non videtur bene dictum; quoniam sicuti per certum tempus esse coniūctum non tollit immaterialitatē, ita neq; esse semper coniūctum, sicut dicit Philosophus 1. Ethic. contra Platonem, diuturnitatem tēporis non auferre speciem; quod confirmatur, quoniam intelligentia in mouendo orbē dependet semper à corpore, & tamen ipsa sic dependens immaterialis est; quare & intellectus supposito quod semper esset coniūctus corpori non tamen sequitur ipsum, esse materiale: Quod si fortē veritatem continere dicitur de intelligentia, quoniā corpus suū æternū est, at humanus intellectus corpus habet caducum; quare vel corrupto corpore ipse non esset, quod positioni repugnat, vel si esset sine opere esset, cū

sine phantasmate per positionem intelligere non posset, & sic otia retur: Sed istud dictum non videtur rationabiliter dictum; primò quoniam non videtur illud sequi, licet enim intellectus separatus non moueretur à phantasia iam corrupta, quid prohiberet ipsum moueri à phantasijs existentibus; quandoquidem sunt omnes eiusdem rationis, & ipse non videtur prohiberi ex loci distantia, cū non sit in loco, & eo præsertim cum multi Theologi & grauiissimi affirmant, & angelos, & animas separatas moueri ab istis inferioribus; deinde illud ad quod deducitur non videtur inconueniens, scilicet in separatione otia, quoniam cum duo opposita insunt naturaliter alicui, non oportet quod in omnitempore vtrumque insit, imò illud impossibile est, sicuti somnus & vigilia naturaliter insunt animali, & vigilia exēpli gratia cōuenit in die, somnus vero in nocte, quare anima cōiuncta intelliget, separata vero otia bitur: Quod si dicitur incōuenire paucissimo tempore operari, & infinito otia, verum hæc responsio semetipsam interimit, nā si infinito tempore separata intelligit, & tunc sine phantasmate, paucissimo autem tempore cum phantasmate, utiq; naturalius erit sibi intelligere sine phantasmate quàm cum phantasmate, quare non conuenienter in definitione animæ ponitur actus corporis physici organici, &c.

Quinto, quia talis essentia verè est sensitiua & vegetatiua; vel igitur post separationē habet potentias quibus exercere possit sua opera, vel non. si secundum videtur contra naturā quod æterno

tēpore sit manca & totaliter priuata, nisi recurratur ad resurrectionē Democriti, vel ad fabulas Pythagoreas; si autē habet, cū careat organis quibus fungitur proprio opere, sequitur iterum quod illarū potentiā sint vanā, quod minimē concederet Aristoteles.

Sexto quod verius talis anima dicatur secundū quid immaterialis & immortalis modo superius exposito, patet per ipsum Philosophum 3. de anima ca. de intellectu agente, ibi enim cum dixisset utrūque intellectum esse separatū & immortālē, dixit postea, sed hic scilicet intellectus agēns verē est qui immortalis est & semper intelligens, ille verō scilicet possibilis non, cum quandoque intelligat & quandoque non intelligat, corrumpitur enim quodam interius corrupto, quod est quia ipse est coniunctus materiā, quare ad corruptionē sensitiuā corrumpitur, erit igitur re corruptibilis, sed secundū quid incorruptibilis, quoniam intellectus qui non est coniunctus materiā est incorruptibilis: hæc itaque mihi ambiguitatem inferunt quoad secundum dictum.

Tertiū dictū est quod talis anima est verē forma hominis, & nō tantū vt motor: Huius quidē dicto ego cōsentio, si ponitur materialis; verū tamē si ponitur immaterialis, vt ipse dicit, nō videtur esse notū, oportet enim talē essentiā esse hoc aliquid & per se stans; quomodo igitur fieri poterit vt sit actus & perfectio materiā, cum tale, scilicet actus materiē sit nō quod est, sed quo aliquid est, vt patet 7. metaph. Quod si dicitur hoc esse peculiare animæ intellectiue; hoc est valde

suspectum, & voluntariè dictum; sic etiam Averroistæ possent dicere quòd anima intellectiva est forma dans esse, & non tantùm operari, cuius oppositum ipse credit secundùm eos: Effet quoque difficultas de esse compositi quod ponitur distinctum ab esse animæ, quodnam est illud esse, & quodnam corrumpitur; de quo etsi ipsi multa dicant, fateor me eorum verba tenere, sed non sensum: Quare sapienter mihi visus est Plato dicere ponens animam immortalem, quod verius homo est anima vtens corpore, quàm compositum ex anima & corpore, & verius eius motor scilicet corporis, quàm eius forma, cum anima sit illud quod verè est & verè existit, & potest induere corpus & eo spoliari: Non video enim quin & D. Thomas non habeat hoc dicere.

Quantum verò dictum erat de multiplicatione animarum, quod etiam non minùs apud me dubium est; cum 12. metaph. tex. 49. dicit Aristoteles talem multiplicationem esse per multam materiam: Quòd autem dicitur à quibusdam distingui per habitudines ad diuersas materias, vel quod loquitur Aristoteles per principia indiuiduantia, quæ materia possunt appellari: Mihi & ista videntur intricamenta, & nouæ inuentiones pro sustentanda positione, & nullo pacto ad mentem Aristotelis, sic enim intelligentias in eadem specie possemus multiplicare, imò ipsum Deum, quod quantum consonet Peripateticis alijs relinquo considerandum: & licet aliqui concedant de intelligentijs:

& negent de Deo adducentes novas rationes, quòd Deus multiplicari non potest ; Certum est quòd illas rationes non fecit, nec vidit Aristoteles, & Deus scit quantum valeant in via Aristotelis ; sed tantum superiori rationi simpliciter innititur : Amplius, quia secundum principia Aristotelis mundus est æternus, & homo æternus, cum sol & homo generent hominem 2. phys. & 8. eiusdem, semper homo fuit genitus ab homine ; Quare aut dabitur infinitum in actu, quod apertè ubique negat, aut oportet recursum habere ad fabulas Pythagoreas impugnatas in erratis, aut ad resurrectionem Democriti, quod non minùs reputatum est vanum.

Quantum etiam dictum non minùs videtur deficere ; Nam quòd ponat animam intellectiuam de nouo fieri, illud quidem concedimus ; verum quòd non per generationem, sed per creationem ; hoc non videtur sonare dictis Aristotelis ; cum nunquam de tali creatione fecerit mentionem ; imò si eam posuisset, apertè peccasset per fallaciam consequentis in 8. phys. cum voluit probare mundum nunquam incepisse, cum tantum per veram generationem illud ostendat ; quòd si præter generationem posuisset etiam creationem, suum erat etiam probare quòd non per creationem, quòd minime fecit ; quare manifestè peccasset. Quod etiam ulterius additur immediatè scilicet à Deo creari non videtur eidem Aristoteli consonum, cum ponat Deum in hæc inferiora non agere

nisi per causas intermedias, huncque esse ordinem essentialem, quod autem ulterius additur quod à parte post non desinat, istud ex toto videtur eius intentioni contradicere: primò quidem, nam omne incorruptibile est ingenitum i. de cælo tex. 125. vbi probat eorum conuertibilitatem, sed per concessa, anima intellectiua est incorruptibilis, ergo ingenita, ergo nunquam incepit, quod est oppositum concessi: Sed huic dicitur negando ultimam consequentiam, ergo nunquam incepit: sed tantum sequitur, ergo nunquam incepit per veram generationem: sed hoc manifestè contradicit textui, sicut etiam notavi cum exponerem illum locum: Nam Aristoteles dicit ingenitum voco quod est, & nunquam fuit verum dicere quod fuit: si igitur anima intellectiua est ingenita vt ibi loquitur Philosophus, ergo nunquam fuit verum dicere quod non fuit: nam vt expressè patet, vult illud esse genitum non solum quod habet veras causas generationis, sed quodcumque incipit esse quomodo cumque incipiat, quod vult conuerti cum corruptibili proportionabiliter sumpto, & sic sumit ingenitum & incorruptibile: Præterea mirabile est quod tot tantasque rationes adducat Aristoteles ad probandum conuertibilitatem illorum, & nunquam exceperit animam intellectiuam, valde enim magnam causam dedisset errandi: Præterea quod ulterius dicit eas remanere post mortem, & nullam Aristoteles faciat mentionem de eis valde improbable videtur, cum Aristoteles tam diligens naturæ per-

scrutator, in Poësi, in Rhetoricis, & in multis alijs fuerit tam diligens, & in re tam excellenti negligens: Amplius quia 1. Ethic. videtur ponere nullam felicitatem post mortem; imò quod magis est D. Thomas in 1. lectione 3. Ethic super illa parte quod quis magis debet eligere mortem quam magnum scelus committere, quasi dubius quomodo Aristoteles hoc ponit, dicit quòd hoc dixit Aristoteles, quia post mortem remanet gloria, vel quia persistere in illo actu virtuoso per modicum tempus existimat melius quam vivere diu in actu vitioso: modo si D. Thomas credidit Aristotelem tenere immortalitatem, nulla harum causarum esset conueniens, in pròptu enim esset propter alium statum: vnde D. Thomas quasi admiratur quòd cum Aristoteles ponat post mortem nihil esse, quomodo vult quòd aliquis malit mori, quam malè vivere: nam & ipse in expositione Symboli Apostolorum super carnis resurrectionem dicit, quod si non expectaremus resurgere, homo magis deberet perpetrare quodcunque scelus quam mori: Amplius vt supradictum est, mirabile esset quòd Aristoteles nullam fecisset mentionem de tali statu post mortem, neque promississet declarare, quòd tamen est contra suum morem: Præterea oportet vel ponere resurrectionem, vel fingere fabulas Pythagoreas, vel otiosi tam nobilissima entia, quæ omnia videntur remotissima à Philosopho: hæc autem dicta sint, non vt tanto Philosopho contradicamus, quid enim pulex contra elephantem: sed studio addiscendi,

In quo ponitur quintus modus, scilicet quod eadem essentia animæ est mortalis & immortalis, verum simpliciter mortalis, & secundum quid immortalis.

CAPVT IX.

CUm itaque primus modus ponens intellectuum realiter distingui à sensitiuo in mortalibus secundum omnes impugnatus sit modus: Et secundus ponens quod intellectuum & sensituum sunt idem re, & tale est simpliciter immortale & secundum quid mortale, sit valde ambiguus, nec conuenire videtur Aristoteli; reliquum est vt ponamus vltimum modum, qui ponens sensituum in homine identificari intellectiuo, dicit quod essentialiter & verè hoc est mortale, sed secundum quid immortale; & vt ordine procedamus, dicimus iuxta illa quinque dicta in superiori capitulo.

Primum quidem nos simpliciter concedimus, scilicet quod intellectuum & sensituum in homine identificantur in re.

In secundo nos discordamus, quia dicimus quod tale verè & simpliciter est mortale, secundum quid verò & impropriè immortale.

Ad cuius euidentiã sciendum est, & valde memoriæ mandandum in hac materia, quod cum omnis cognitio quoquo modo abstrahat à materia, materia impedit cognitionem, vt ait Commentator 3. de anima comm. 5. Et illud est videre in sensibus qui non cognoscunt secundum qualitates reales, sed secundum eorum intentiones, quare 2. de anima dicitur quoddam proprium est unicuique sensui esse receptiuum specierum siue materia: iuxta itaque tres modos separationis à materia, tres modi cognitionis in vniuersum reperiuntur, quædam enim sunt quæ totaliter sunt separata à materia, & sic hæc in eorum cognitione neque indigent corpore tanquam subiecto, neque tanquam obiecto, eorum enim cognitio non recipitur in corpore, cum ipsa non sint in corpore, neque à corpore mouentur, cum sint mouentia non mota, & hæc sunt substantiæ separatae, quas intellectus vel intelligentias appellamus, in quibus neque discursus, neque compositio, neque aliquis motus reperitur, quædam vero sunt quæ si non cognoscant per qualitates sensibiles, verum per earum species, quæ quendam modum immaterialitatis induunt, etenim & sine materia dicuntur, & spirituales sunt, tamen quia in genere cognoscentium infimæ sunt & valde materiales sunt, ideo in suis operationibus indigent corpore & tanquam subiecto & tanquam obiecto: etenim tales cognitiones & in organo recipiuntur, quare & solum singulariter representant, & à re corporea mouentur, & hæc

sunt omnes vires sensitivæ, licet aliquæ illarum sint magis spirituales, & aliquæ minùs, vt ait Commentator 3. de anima comm. 6. & in libro suo de sensu & sensato; Cum natura autem ordinatè procedat, vt dicitur 8. Phys. inter ista duo extrema, scilicet non indigere corpore vt subiecto vel vt obiecto, & indigere corpore vt subiecto & obiecto, est medium quod neque est totaliter abstractum neque est totaliter im-
mersum; quare cum fieri nequeat vt aliquid indigeat corpore tanquam subiecto, & non tanquam obiecto; vt manifestum est; relinquitur vt tale intermedium non indigeat corpore tanquam subiecto, verùm tanquam obiecto; hoc autem est intellectus humanus; qui per omnes antiquos & modernos ponitur medijs inter abstracta & non abstracta, scilicet inter intelligentias & gradum sensitivum, infra quidem intelligentias, & supra sensitiva; Quare & in Psalmo dicitur, minuisti paulò cum ab Angelis; & paulò post, constituisti eum super opera manuum tuarum, vires; & boues &c. hicque modus cognoscendi est ille quem dixit Aristoteles 1. de anima tex. 12. si intelligere aut est phantasia, aut non sine phantasia, non contingit hoc esse sine corpore; Et cum 3. de anima declarauit intelligere non esse phantasiam, cum non sit organicum, & quod non potest esse sine phantasia, cum 29. & 39. eiusdem textu, nequaquam sine phantasmate intelligit anima; Ergo anima humana non indiget organo vt subiecto, sed vt obiecto; istis autem omnibus grã-

dibus cognoscitiuis secundum Aristotelem & Platonem competit esse animas; quare saltem secundum Aristotelem quodlibet cognoscens est actus corporis physici organici, verum aliter & aliter; Nam intelligentiæ non sunt actus corporis qua intelligentiæ sunt, quoniam in suo intelligere & desiderare nullo pacto indigent corpore, sed qua actuant & mouent corpora cælestia, sic animæ sunt, & sunt actus corporis physici organici, stella namque est organum cæli 2. de cælo & 12. Metaph. tex. 48. omnis orbis est propter stellam; quare actuant corpus physicum organicum, & vt sic indigent corpore vt obiecto, verum sic actuando & mouendo nihil recipiunt à corpore, sed tantum dant ei: Anima autem sensitiua simpliciter est actus corporis physici organici, quia & indiget corpore tanquam subiecto, cum non fungatur suo officio nisi in organo, & indiget corpore tanquam obiecto: media verò quæ est intellectus humanus in nullo suo opere totaliter absoluitur à corpore, neque totaliter immergitur; quare non indigebit corpore tanquam subiecto, sed tanquam obiecto & sic medio modo inter abstracta & non abstracta erit actus corporis organici; nam intelligentiæ quæ intelligentiæ non sunt animæ, quia nullo modo vt sic dependent à corpore, sed qua mouent corpora cælestia; At intellectus humanus in omni suo opere est actus corporis organici, cum semper dependeat à corpore tanquam obiecto; est & differentia inter intelligentiam & intellectum humanum in dependendo ab or-

gano ; quoniam humanus recipit & perficitur per obiectum corporale , cum ab eo moueatur. At intelligentia nihil recipit à corpore cœlesti sed tantum tribuit : A sensitiua autem virtute differt intellectus humanus in dependendo à corpore , quia sensitiua subiectiuè & obiectiuè dependet , humanus autem intellectus obiectiuè tantum : Et sic medio modo humanus intellectus inter materialia & immaterialia est actus corporis organici : Quapropter non vno modo corpora cœlestia , homines , & bestię animalia sunt , cum non vno modo eorum animæ sint actus corporis physici organici , vt visum est : Ideo Alexander in paraphrasi de anima dixit intelligentiam satis æquiuocè dici animam cœli ; & cœlum animal : Cui & consentire videtur Auerroës libro de substantia orbis ; propriè verò bestię animalia dicuntur , sicut est communis vsus loquendi , medio autem modo homines animalia nuncupata sunt : Neque apud Aristotelem fingendum est quod iste modus intelligendi intellectus humani sit ei accidentalis , scilicet moueri ab obiecto & non indigere subiecto , tum quia vnius rei est tantum vnus modus operandi essentialis , tum quia sicut modus sensitiuæ nunquam transmutatur in modum intelligentiæ vel intellectus humani , neque modus intelligentiæ in modum humani vel sensitiui , ita pariter modus humanus intelligendi non videtur posse transmutari in modum intelligentiæ , quod esset si intelligeret absque indigentia corporis vt subiecti & obiecti : hoc etiam firmatur ,
quia

sic natura trāsmutaretur in alterā naturā, cum & operationes essentielles trāsmutarentur Amplius per nullum naturale signū cognosci potest intellectū humanum habere alium modum intelligendi vt experimento comprehendimus, quoniā semper indigemus phantasmate: Quare concluditur quod hic modus intelligendi per phantasma est essentialis homini: Ex quibus modō est syllogisanda conclusio principalis intenta, scilicet quod anima humana simpliciter materialis est, & secundū quid immaterialis.

Primò per syllogismum diuisiuum sic; humanus intellectus est immaterialis & materialis, vt patet per habita; sed non æqualiter de his participat, neque est plus immaterialis quā materialis, vt probatum est capite præcedenti; ergo est magis materialis quā immaterialis, & sic simpliciter erit materialis, & secundū quid immaterialis.

Secundo, essenziale est intellectui intelligere per phantasmata vt monstratum est, & patet per definitionem animæ, cum sit actus corporis physici organici; quare in omni opere indiget organo; sed quod sic intelligit de necessitate inseparabile est; ergo humanus intellectus mortalis est: Minor autem patet, tum ex Aristotele dicente, si intelligere est phantasia, aut non sine phantasia, non contingit ipsam separari, tum quia si separabilis esset, vel non haberet operationem & sic otiaetur, vel haberet, & sic phantasmate operaretur, quod est contra maiorem demonstratam: Et iterum hoc sic

D

firmatur, quoniam Aristoteles non posuit aliā quā intelligentiam sine corpore, cum 12. metaph. secundum numerum orbium ponit numerum Intelligentiarum: Multò ergo minùs potest ponere intellectum humanum sine corpore; cum sit longè minùs abstractus quā intelligentia; imò si mundus est æternus, vt opinatus est Aristoteles, infinities infinitæ formæ sunt actualiter sine corpore, quod apud Aristotelem ridiculum videtur, quare anima humana apud Aristotelem absolute pronuntianda est mortalis; verùm cum sit media inter abstracta simpliciter, & immersa materiæ, quoquo modo de immortalitate participat, quod & sua essentialis operatio ostendit; nam non dependet à corpore tanquam subiecto, in quo conuenit cum intelligentijs, & differt à bestijs, & indiget corpore vt obiecto in quo conuenit cum bestijs; quare & mortalis est: Et ad completam intelligētiam eorum quæ dicta sunt, scire oportet, quid sit indigere organo vt subiecto, & vt obiecto, & eis non indigere.

Indigere itaque organo vt subiecto, est in corpore recipi, & modo quantitatiuo & corporali, sic quod cum extensione recipiatur, quo modo dicimus omnes virtutes organicas recipere, & suis officijs fungi, sicut oculus videndo & auris audiendo, visio namque est in oculo & modo extensiuo; quare non esse in organo, siue subiectiuè eo non indigere, est vel non esse in corpore, vel in eo non esse modo quantitatiuo; vnde dicimus intellectum non indigere corpore vt subiecto in sui intellectiōe, non

quia intellectio nullo modo fit in corpore, cum fieri nequit si intellectus est in corpore vt sua immanens operatio quoquo modo non fit in eo, vbi enim subiectum est & accidens subiecti necesse est esse: sed pro tanto intellectio dicitur non esse in organo & in corpore, quoniam modo quantitatiuo & corporali non est in eo; quapropter potest intellectus reflectere supra seipsum, discurrere, & vniuersaliter comprehendere, quod virtutes organice & extensæ minimè facere queunt; hoc autem totum prouenit ex essentia intellectus, quoniam qua intellectus est non dependet à materia, neque à quantitate, quod si humanus intellectus ab ea dependet, hoc est vt sensui cōiunctus est, quare accidit sibi qua intellectus est à materia & quantitate dependere; vnde & eius operatio non est magis abstracta quàm essentia, nisi enim intellectus haberet quod ex se posset esse sine materia, intellectio ipsa non posset exerceri nisi modo quantitatiuo & corporali: At quamuis intellectus humanus vt habitum est, intelligendo non fungatur quantitate: Attamen quoniam sensui coniunctus est, ex toto à materia & quantitate absolui non potest, cum nunquam cognoscat sine phantasmate, dicente Aristotele 3. de anima, nequaquam sine phantasmate intelligit anima, vnde sic indigens corpore vt obiecto, neq; simpliciter vniuersale cognoscere potest, sed sēper vniuersale in singulari speculatur, vt vnusquisq; in seipso experiri potest;

D ij

In omni namque quantumcunque abstracta cognitione idolum aliquod corporale sibi format, propter quod humanus intellectus primò & directè non intelligit se, componitque, & discurrit; quare suum intelligere est cum continuo & tempore, cuius totum oppositum contingit in intelligentijs quæ sunt penitus liberatæ à materia; ipse igitur intellectus sic medius existens inter immaterialia & materialia, neque ex toto est hîc & nunc, neque ex toto ab hîc & nunc absoluitur, quapropter neque sua operatio ex toto est vniuersalis, neque ex toto est particularis, neque ex toto subijcitur tempori, neque ex toto à tempore remouetur: Rectò autem & ordinatè sic processit natura, vt à primis ad extrema per media deueniat; intelligentiæ enim cum simpliciter abstractæ sint, nullo modo intelligendo indigent corpore vt subiecto, vel vt obiecto; quare simpliciter naturam cognoscunt, primò se intelligentes, & simplici intuitu, quapropter & à tempore, & à continuo absolutæ sunt: virtutes autem sensitiuæ, cum immersæ sunt materiæ, tantum singulariter cognoscunt, non reflectentes supra se ipsas, neque discurrentes: At humanus intellectus sicut medius existit in esse, sic & in operari, veluti retrò dictum est, vnde recepta in eo, neque penitus sunt potentiâ intellecta, nec actu intellecta: Pater igitur quid sit indigere corpore vt subiecto & vt obiecto, & eis non indigere, quæque indigent, quæque non indigent, & quomodo

do. Vtteriúsque sciendum est quod quicunque ponunt animam humanam esse immortalem, & multiplicatam dicunt, quòd ex eo quod est nature immaterialis, ipsa est hoc aliquid per se subsistens; quare & sine corpore potest esse & operari, ipsaque sic separata existens non habet de virtutibus animæ nisi intellectum & volútem, sicut & Intelligentiæ, vnde nullam virium sensitiuarum vel vegetatiuarum habet, nisi velut in principio valde remoto: At quoniam ipsa inter substantias abstractas infimá est, ultra illum modum essendi habet & alium, nam & potest esse quo aliquid sit; quare veraciter potest corpus ipsum informare, & ex sui imperfectione numerari ad numerationem corporum, induitque omnes vires sensitiuæ, & vegetatiuæ quare cū organo illas exercet, & vt sic morticina fit: intellectu autem & voluntatem sic coniuncta corpori quāuis habeat, liberè tamen eas exercere non valet, quandoquidem sine corporali instrumento saltem vt obiecto earum officio fungi non potest, cuius oppositum contingit in separatione, quoniam totaliter absque organo corporali exire potest in actum: At altera opinio existimans hæc esse deliramenta, & principijs Philosophiæ repugnantia, vtpote quod idem sit hoc aliquid per se subsistens & etiam quo hoc aliquid aliud sit: tanquam disparatos modos operandi habens, modusque ille essendi separatus nulla ratione vel experimento probatus, sed sola voluntate positus, modóque habens potentias sensitiuæ & vegetatiuæ, modò eas deserens, secundum

D iij

vnum modum intelligens coniuncta, secundum
 alium separata, paucissimoque tempore con-
 iuncta, infinito separata, nisi fingamus trans-
 migrationem animarum in corpora ipsamque in-
 cepisse, & numquam defecturam, modo induens
 corpus, modo spoliens, ut vulgus fert de lamijs,
 cumque à corpore separatur definit actualiter ef-
 se actus corporis; quare vel nullibi est, vel si ali-
 cubi, quomodo igitur illuc peruenit, aut enim
 alteratione, aut motu locali, non alteratione,
 ut manifestum est; neque motu locali, cum 6.
 physic. indiuisibile localiter moueri non potest,
 quod si nullibi ponitur, quid igitur prohibet
 secundum Aristotelem ponere & aliquas intel-
 ligentias non mouentes orbes, infinitesque infi-
 nita ponetur illa multitudo, neque sciri potest an
 otietur vel operetur, nisi confectum aliquid vel
 voluntarium ponatur, cumque materialia actu in-
 finita esse non possunt, in quibus manifesta est
 multiplicatio, & etiam necessaria est in immate-
 rialibus, in quibus non est necessaria multiplica-
 tio, neque possibilis est distinctio in eadem specie
 ponitur infinita multitudo actu: Quapropter cum
 hec omnia irrationabilia & ab Aristotele aliena
 esse videantur, ideo rationabilius videtur quod
 anima humana cum sit suprema & perfectissima
 materialium formarum, verè est quo aliquid est
 hoc aliquid, & nullo modo ipsa verè est hoc ali-
 quid, quare verè est forma simul incipiens & desi-
 nens esse cum corpore, neque aliquo pacto potest
 operari vel esse sine eo, vnumque tantum modum ef-
 fendi vel operandi habet, quare & multiplicari

potest, cū istud verè sit principium multiplicandi in eadē specie, neque sunt actu infinitæ, sed tantū potentia, sicut & cætera materialia, virtutesque habet organicas & simpliciter materiales scilicet sensitivæ & vegetativæ, verū cū ipsa sit materialium nobilissima in confiniōque immaterialium aliquid immaterialitatis odorat, sed non simpliciter, vnde habet intellectum & voluntatem, in quibus cū Dijs convenit, verū satis imperfectè & æquivocè, quandoquidem Dij ipsi totaliter abstrahunt à materia, ipsa verò semper cum materia, quoniā cum phantasmate, cū continuo, cum tempore, cum discursu, cum obscuritate cognoscit, quare in nobis intellectus & voluntas non sunt syncerè immaterialia, sed secundū quid & diminutè, vnde verius ratio quàm intellectus appellari dicitur; non enim vt ita dixerim, intellectus est, sed vestigium & umbra intellectus, cui testatur quod dicitur 2. metaph. sicut se habet oculus nycticoracis ad lumē solis, sic intellectus noster ad manifestissima in natura, quanquam perversè illud exposuerit Auerroës, & quemadmodum luna est de natura terræ, vt dicit Aristoteles lib. de anim. sic anima humana est de natura intelligentiæ, in luna autem est terra solū secundū proprietatem, non autem secundū essentiam; quare & intelligere est in anima humana secundū participationem proprietatis & non essentiæ; hoc autem totum consonat naturæ quæ gradatim procedit, vegetabilia enim aliquid animæ habent, cū in seipsis operentur: At multū materialiter, cū suis non

fungatur officijs nisi per qualitates primas, & ad esse reale earum operationes terminantur: Deinde succedunt animalia solum tactum & gustum habentia, & indeterminatam imaginationem; post quæ sunt animalia quæ ad tantam perfectionem perueniunt ut intellectum habere existimemus, nam multa mechanicè operantur, ut construendo casas; multa ciuilitè, ut apes, multa omnes ferè virtutes morales, ut patet inspicienti libros de hist. anim. in quibus miranda ponuntur quæ referre nimis esset prolixum; imò infiniti ferè homines minùs videntur habere de intellectu quàm multæ bestiæ. Ponitur & cogitatiua inter vires sensitivas, de cuius excellentia quid dicere oportet, quando teste Commentatore 2. de anima comm. 60. cognoscat indiuidua decem prædicamentorum, ratioque particularis ab omnibus posita sit; imò Galenus, Homerus, & multi excellentes viri ipsam esse intellectum existimauerunt; quod si parùm ascendamus, huiusmodi intellectum ponemus immediatè supra cogitatiuam, & infra immaterialia, de utroque participantem, ut scilicet non indigeat corpore ut subiecto ad modum prius expositum, & indigeat ut obiecto, qui modus est sibi essentialis & inseparabilis; quare inter materiales formas absolutè reponendus est, cui attestatur quòd tantùm cum mortalibus conuersatur nisi fingamus (ut Antiqui) homines Deos fieri & in cælum rapi, quod totum fabulosum 3. & 12. metaph. esse exi-

stimauit Aristoteles, illudque à legibus esse confectum propter hominum vtilitatem. Ad hanc itaque positionem nullum sequi videtur inconueniens, omnia rationi & experimentis consonare, nihil fabulosum, nihil creditum poni. Quòd si quæ videntur contra hunc modum esse, utpote cum sit in materia calida & frigida, quomodo fieri potest ut non qualis fiat, & in sui opere organo non fungatur, & vniuersaliter non recipiat; hæc certè & huiusmodi satis debilia non minùs difficultatem faciunt contra priorem positionem, cum & ipsa fateatur esse formam in materia. Quòd si quis dicat neutram opinionem esse veram, sed illam Auerrois, profectò apud me quicumque eam opinionem imaginatur ipse est fortissimæ imaginationis, credoque pictores nunquam pulchrius monstrum hoc monstro finxisse, cum hoc quoque sit contra Aristotelem ut supra monstratum est. Quare hæc recitata mihi inter omnes probabilior videtur, magisque ad mentem Aristotelis. Ex quibus omnibus patere potest, quòd multa quæ dicuntur ab Aristotele de intellectu videntur se inuicem oppugnare cum minimè oppugnent: dicit enim quandoque quod est materialis & mixtus seu non separabilis, quandoque verò quod est immaterialis & separabilis. In definitione namque dicitur quod est actus corporis organici, quandoque verò dicitur quod nullius corporis est actus, hæc verò pugnantia videntur; quare in diuersos tramites diuersi declinauerunt, & aliqui existimant Aristotelem

seipsum non intellexisse; verum omnia iam aperta sunt ex prædictis, neque vlla est contrarietas; intellectus enim absolute & quâ intellectus est omnino immixtus, & separatus est, at humanus utrumque retinet, nam separatur à corpore ut subiecto, non separatur vero ut obiecto; intellectus etiam quâ intellectus, nullo modo est actus corporis organici, quoniam intelligentiæ non indigent organo ad intelligendum, sed tantum ad mouendum; At intellectus humanus quia humanus, est actus corporis organici ut obiecti, & sic non separatur, non autem ut subiecti, & sic separatur, quare nullum repugnans.

In tertio autem dicto, videlicet quod anima est verè forma hominis, apparet quod longè melius secundum istum modum saluatur quàm secundum priorem; est enim, ut dicebatur, valde difficile imaginari quod vnum per se existens sit verè forma; quare D. Gregorius Nissenus, ut refert D. Thomas de eo, cum vidit Aristotelem dicere animam esse actum corporis, dixit Aristotelem credere animam humanam esse corruptibilem, quia forma per se existens verè non potest esse actus corporis organici, imo & aliqui dicunt hoc etiam sensisse Gregorium Nazianzenum de Aristotele.

Quartum autem, scilicet quod animæ humanæ sint numeratæ, affirmamus; verum illa quæ superiorem modum torquebant, nos non torquent; etenim cum materiales sint, distinguuntur per materiam, neque infinitas animarum nos conturbat.

De quinto etiam dicimus quòd anima humana est facta, sed non per creationem, verùm per generationem, cùm sol & homo genetent hominem 2. phys. & ipsa est vltima in consideratione naturali; & quod dicitur 1. de part. cap. 1. de intellectu non spectare ad naturalem, verum est de vero intellectu, ipse enim est mouens non motus; at humanus est mouens motus; quare hic est de consideratione, ille verò minimè, cùm 2. phys. quæ non mota mouent non sunt physicæ considerationis; & hanc rationem tangit Philosophus ibi 1. de part. Cùmque vltiùs dicebatur ipsam venire de foris, intelligendum est, vt mens simpliciter, non vt humana; vel si vt humana, intelligendum est non absolute, sed quòd in ordine ad sensitiuam & vegetatiuam magis participat de Diuinitate; Nam 4. de part. cap. 9. solus homo est erectę nature, quia solus homo multę Diuinitatis est particeps; non tamen ponimus quòd homo remaneat post mortem quantum ad eius animam, cùm incipiat esse, & 1. de cælo quicquid incipit desinit, & Plato 8. de legibus dicit, quicquid quomodocumque incipit esse, & desinit esse; & quod dicitur de textu 17. duodecimi metaph. non approbo Alexandri responsionē quā ibi refert Cōmentator ex relatione Themistij, illud s. intelligi de intellectu agente, nā intellectus agens non est forma hominis; sed intelligitur de intellectu possibili, qui quandoque intelligit, & quandoque non; corrumpitur n. quodam interius corrupto, id est sensitiuo cui identificatur, verū Aristoteles illud intelligit

de per se & non per accidens, quasi dicat nihil prohibere eum remanere qua intellectus est, nō qua humanus, cum iam 1. de cōlo monstratum est quod omne genitum corrumpitur; sed quod hęc mens fuerit Aristotelis de anima humana potest manifestari ex 12. metaph. tex. 39. vbi scribit hęc. Delectatio autem qualis optima paruo tempore nobis, sic enim semper illis est, nobis quidem impossibile. Ex quibus verbis primò apparet quod Dij simpliciter immortales sunt; nam si semper delectantur, quoniam semper intelligunt, in eodem. n. textu sequitur, vigiliatio, sensus, & intelligentia delectabilissimum: si ergo semper delectantur semper sunt: Ergo immortales sunt: At homines mortales sunt, quoniam paucissimo tempore delectantur, operari enim sequitur esse: Quod si homo quandoque immortalis nuncupatur, id intelligitur secundum quid, quoniam & 2. de part. cap. 10. dicitur, solus homo inter mortalia maximæ Diuinitatis est particeps, comparatūque ceteris mortalibus immortalis dici potest, sicut enim dictum est, homo est medius inter Deos & bestias, quare sicut pallidum comparatum nigro dicitur album, sic homo comparatus bestiis dici potest Deus & immortalis, sed non verè & simpliciter: Quod si maiores nostri homines in Deos versos aliquando posuerunt inquit Aristoteles 12. metaph. tex. 50. hoc fabulosè posuerunt ad persuasionem multorum, & ad opportunitatem multorum, & ad leges conferens: sed solus Deus ipse proprie immortalis dicitur, in fine n.

illius 39. textus dicit, dicimus autem Deum animal esse sempiternum optimum ; quare vita & duratio continua & æterna existit Deo , hoc enim Deus. Alterum etiam ex istis verbis apparet scilicet humanum intellectum sine phantasmate non intelligere : namque æterna semper delectantur, quia semper intelligunt , ipsa in sua intellectione non indigent phantasmate, si enim indigerent , æterna non essent , cum 2. de anima phantasia sit motus factus à sensu secundum actum , imò nec sunt mota ab aliquo dum intelligunt , dicente Philosopho eodem tex. 50. diuinissimum & honorabilissimum non transmutatur : indignius enim transmutatio & motus quidem iam tale : imò in eis, quod intelligit, quod intelligitur, & intellectio idem sunt, ut eisdem citatis textibus dicitur : At humanus intellectus cum paucissimo tempore intelligit, non potest absolui à phantasmate, cum non intelligat nisi motus, nam intelligere in quodam pati consistit , mouens autem intellectum est phantasma ut patet 3. de anima : quare non intelligit sine phantasmate, quanquam non sicut phantasia cognoscit : quoniam medius existens inter æterna & bestias vniuersale cognoscit, secundum quod cum æternis conuenit, & differt à bestiis ; tamen vniuersale in singulari speculatur, quod differt ab æternis, & conuenit quoquo modo cum bestiis : bestię autem ipsę in fine cognoscentium constitutę neque simpliciter vniuersale, neque vniuersale in singulari, sed tantum singulare singula-

riter comprehendunt : Sunt itaque in vniuersum tres modi animalium, cūque omne animal cognoscit, sunt & tres modi cognoscendi; sunt n. animalia omninò æterna, sunt & omnino mortalia, sunt & media inter hæc; prima sunt corpora cœlestia, & hæc nullo modo in cognoscendo dependent à corpore; alia verò sunt bestię, quæ à corpore dependent vt subiecto & obiecto, quare tantum singulare cognoscunt; intermedia verò sunt homines, non dependentes à corpore vt subiecto, sed tantum vt obiecto, quare neque vniuersale, simpliciter vt æterna, neque singulariter tantum, vt bestię, sed vniuersale in singulari contemplantur: hos autem tres modos cognoscendi insinuauit Aristoteles 1. de anima cū dixit, si intelligere est phantasia, aut non est sine phantasia; nam per phantasiam intelligit sensum qui utroque modo indiget corpore, scilicet vt subiecto & vt obiecto; per non esse verò phantasiam & non esse sine phantasia, intelligit intellectum humanum, quare indiget corpore vt obiecto & non vt subiecto; illud autem quod neque est phantasia & omnino est sine phantasia, verè intellectus est, & est diuinorum; neque plures modi cognoscendi ab Aristotele in aliquo loco sunt reperti, neque consonat rationi; dicere enim vt volunt affirmantes intellectum humanum esse absolutè immortalem, ipsum intellectum duos habere modos cognoscendi, scilicet sine phantasmate omninò, & alium cum phantasmate, est transmutare naturam humanam in diuinam, & parum hoc distat à fabulis Ouidij in

libro metamorphoseos, concedit enim philosophos antiquos hoc fabulosè posuisse ad utilitatem legum, sicut dictum est. Quod si quis calumniabitur, quoniam dictum illud, scilicet nos paucissimo tempore delectari, intelligendum esse de homine, & non de eius anima; quare homo non intelligit sine phantasmate, homo enim mortalis est, at anima eius immortalis est, quare ut in separatione sine phantasmate intelligit; sed obsecro sic calumniantem, imò cauillantem videre nedum Aristotelem interpretari studeat Aristotelem corrumpat; in primis quidem quoniam Aristoteles hîc non facit differentiam inter hominem & animam, cùm neque inter Deum & corpus cœleste, dicit enim Deum esse animal æternum; secundò quia si tantum de homine & non de anima eius intelligit, ubi igitur de cognitione animæ separatæ loquitur? Nam ibi erat locus, cùm in metaphysica sit quæ est de separatæ. Tertiò quia sic anima humana simpliciter efficeretur diuina, cùm modum operandi Diuinorum sumeret, & sic poneremus fabulas Ovidij, scilicet naturam in alteram naturam transmutari. Quartò quoniam in tanta re Aristoteles nunquam verbum faciens maximè esset accusandus: quare sic excusantes Aristotelem, maximè Aristotelem incusant. Quòd si quis dicat quod de esse animæ separatæ Aristoteles 3. de anima textu comm. 36. promittit tractare cum dixit se posterius pertractaturum an humanus intellectus possit separata intelligere: quare vel liber metaphysicæ ab Aristotele non fuit per-

fectus fortassis morte præuento, vel quoniam nondum complementum peruenit ad nos, unde non mirum sit si de eius esse separato nihil ab Aristotele habemus, quod per Commentatorē 3. de anima comm. 36. confirmatur, cum ipse dicat istam quæstionem non fuisse terminatam ab Aristotele quantum adhuc habemus per eius libros, quare est tam difficilis. Ad hoc autem dicitur quod illa verba magis arguunt oppositum, quam propositum, dicit enim sic, ut cum autem contingat aliquem separatorum intelligere ipsum existentem non separatum à magnitudine, aut non, considerandum posterius: ex quibus apparet primò quod intellectus humanus à magnitudine non est separabilis, quare siue phantasia non cognoscit, & si sic, inseparabilis est, quoniam si est phantasia aut non siue phantasia inseparabilis est: verum ad quod dicitur (posterius perscrutandum) D. Thomas in expositione ultimi textus 9. metaph. dicit, in illo textu Aristoteles illam quæstionem determinare, quam insolutam 3. de anima reliquit, quanquam ipse D. Thomas 3. de anima aliter dixerit, scilicet in Metaphysica in melius mutauit sententiam: verum talis cognitio quæ 9. metaph. ponitur de intelligentijs non est siue phantasmate, cum & in principio 2. metaph. dicat Aristoteles intellectum nostrum ad separata se habere sicut Nycticorax ad lumen solis: unde & D. Thomas lib. 3. contra gentiles cap. 48. dicit sententiam Aristotelis de intellectione separatorum esse, quod tantum ea intelligimus
lecun-

secundum cursum scientiæ speculatiuæ, quare non sine phantasmate vt notum est: & diligenter aduerte quod ibi videtur innuere hanc nostram opinionem, scilicet quod Aristoteles senserit animam humanam non verè esse intelligentem, sed solum habere quandam participationem intellectus, quare & improprie immortalis; puto tamen quod & illud verbum (posterius perscrutandum) potest intelligi de libris Ethicorum, ibi enim declarat quod vltima felicitas animi est in contemplatione abstractorum per Metaphysicam; quare idem quod prius.

*In quo respondetur ad obiecta aliarum
opinionum.*

CAPVT X.

VT validior sit nostra positio operæ pretium est ad ea quæ in oppositum per alias opiniones adducta sunt respondere: & quoniam tenemus in homine idem secundum rem esse vegetatiuum, sensitium & intellectiuum, ideo respondetur quod contradictoria de eodem absolute dici non possunt, tamen quod vnum absolute & alterum secundum quid, vel ambo secundum quid non inconuenire, sicut dicitur in Elenchis, & sic est in proposito, nam intellectus humanus absolute est mortalis & secundum quid immortalis.

Ad primum contra secundum dictum dicitur quod anima humana sic potens recipere omnes species formarum materialium duas habet conditiones : vnā scilicet quod secundum se est immaterialis & non indigens organo tanquam subiecto pro quanto recipit & intelligit illa , quod nos concedimus : verum alteram habet quoniam formas illas non recipit nisi mota à phantasmatibus sicut plane ibi docet Aristoteles , quare indiget organo tanquam obiecto : sed per demonstrata quod sic se habet est simpliciter materiale & secundum quid immateriale , & hæc est nostra conclusio intenta : Quod si dicitur nunquid ipsa est forma materialis ? dicimus quod in parte sic , & in parte non : & quantum ad id quod de immaterialitate participat , licet non cognoscat se per speciem propriam , sed aliorum , vt dicitur 3. de anima , secundum tamen illud esse , potest quoque modo supra seipsum reflectere & cognoscere actus suos , licet non primò & ita perfecte sicut intelligentiæ : nec mirandum est quoniam anima intelligendo non vititur organo corporali , neque appenditijs materiæ : & si vltius instetur , ipsa anima non habet esse nisi in materia , & per qualitates primas vnā cum quantitate , sed cum operari sequitur esse , ergo sine illis operari non potest , ergo non potest operari sine appenditijs materiæ cuius oppositum dicis : Præterea secundum philosophum 2. & 3. de anima , ad hoc vt pupilla recipiat

omnes colores non solum sua essentia non debet esse color, verum nec coniuncta colori, ergo si anima intellectiua debet recipere omnes formas materiales, nedum debet esse immaterialis, verum nec alicui formæ materiali coniuncta, & per consequens neque cum calido vel frigido quod tamen falsum est: verum sic opponens non videt quod & hæc omnia sunt & contra alias opiniones; nam & secundum eas anima non est in materia nisi per quale & quantum, quare & sine illis operari non poterit: quod si qua est responsio pro eis & pro hac erit: vetuntamen ad primum dicitur quod reuera intellectus humanus non potest intelligere nisi in materia sint quale & quantum sensibile, cum non possit operari nisi ipse sit, ipseque esse non potest nisi cum dispositione conuenienti, non tamen sequitur quod per tales dispositiones intelligat, inò vt satis liquet non sequitur in sensu: nam virtus visua non videt nisi oculus sit calidus, non tamen per caliditatem, vel aliquam aliam qualitatem realem videt, sed per speciem visibilem.

Ad secundum dicitur quod materiale vniuersaliter non impeditur per coexistentiam alterius materialis à cognitione, sic enim visus non cognosceret colores, cum visui sint coniunctæ primæ qualitates, sed bene per coexistentiam alicuius illorum quorum ipse est perceptiuus impeditur, per rubedinem enim impeditur à cognitione aliorum colorum quorum & rubedinis est perceptiuus:

E ij

quapropter si intellectus esset pura forma materialis, cum omnium formarum materialium est perceptius, impediretur ab earum cognitione; At ipsum esse immaterialem probatum est, licet non simpliciter immaterialis sit; quapropter per coexistentiam formarum materialium non impeditur, alterius enim rationis sunt materiale & immateriale, intellectus enim agens non impedit possibilem à receptione specierum quantumcunque perficiat possibilem, sicut dicit Commentator comm. 4. & 5. tertij de anima.

Ad secundum verò in oppositum adductum dicitur, quod ea quæ sunt in intelligentijs sunt simpliciter actu intellecta, & penitus à materia denudata; quæ autem sunt in sensu sunt mere intellecta in potentia, quæ verò sunt in intellectu humano medio modo se habent, quoniam species primò vniuersaliter repræsentat, secundariò verò vt in supposito, quandoquidem ex toto absolui non potest à materia, cum intellectus pro quacunque sui cognitione moueatur ab obiecto; & in singulari speculatur vniuersale, sicut dictum est: sed per monstrata hic arguit virtutem secundùm quid, non autem simpliciter immaterialem: Quòd si dicitur cum ipse intellectus sit in hac quantitate, quomodo igitur species in eo recepta poterit vniuersaliter repræsentare: Cui dicitur hoc nihil prohibere: primò quia accidit sibi qua intellectus est vt sit in quantitate: secundò quoniam etsi est in quantitate, tamen quantitas non est principium illius ope-

rationis, neque in eo opere ea per se utitur: Tertio quoniam ut ex dictis patet, non ex toto absoluitur à quantitate & eius conditione, cum semper speculetur vniuersale in particulari: intellectus enim humanus habet, & quod sit intellectus, & humanus, qua enim intellectus est, vniuersale cognoscit, sed qua humanus vniuersale nisi in singulari perspicere nequit: Ad illud verò de organo dicitur iuxta prædicta ipsum indigere eo ut obiecto, non subiecto: quid autem utrumque horum sit superiori capite dictum est: & si instetur nonne coniungitur materiæ per qualitates primas, qualis igitur utique fiet? quare aut calor aut frigus, non igitur omnia cognoscet: Ad quod dicitur intellectum non coniungi materiæ qua intellectus est, sed qua coniungitur sensui: quare etsi in opere sentiendi qualis fiat non tamen in opere intelligendi, propter quod ut intellectus est non est qualis, neque organicus: Quod si ulterius quærat quod intelligere humanum sit accidens quod sine subiecto esse non potest, in quo igitur ponetur ipsum intelligere: Ad quod dicitur verè secundum essentiam ipsum intelligere esse in ipso intellectu, iuxta illud 3. de anima, anima est locus specierum non tota sed intellectus: verum quoniam intellectus humanus est in materia quasi per quandam concomitantiam, & ipsum intelligere quodam modo est in materia sed satis accidentaliter, quoniam intellectui qua intelle-

E ij.

ctus est, accidit esse in materia, non tamen in aliqua parte corporis ponitur ipsi intelligere, sed in toto categorematicè sumpto, non enim in aliqua parte, quoniam sic esset organicus intellectus: & vel non omnia cognosceret, vel si omnia cognosceret vt cogitativa tantum singulariter & non vniuersaliter cognosceret, quare sicut intellectus est in toto, ita & intelligere; non inconuenienter igitur Alexander posuit totum corpus esse instrumentum intellectus, quoniam intellectus omnes vires comprehendit, & non aliquam partem determinatam, quoniam sic non omnia cognosceret, sicut neque aliqua virtutum sensitiuarum quanquam autem sic totum corpus ponatur instrumentum intellectus quasi vt subiectum, non tamen verè est vt subiectum, quoniam intelligere non recipitur in eo modo corporali, vt prius dictum est: Et si amplius quærat, an humanus intellectus indiuisibiliter recipiat; dicitur quòd quā intelligit indiuisibiliter recipit; quā vero sentit, vel vegetat, diuisibiliter: neque inconuenit tam multiplicem naturam tot diuersos modos recipiendi & operandi habere: Ad illud vero de experimento, in primis mirere quomodo Diuus Thomas illud adduxerit, cum Aristoteles 3. Ethic. dicat voluntatem esse impossibilem, veluti in appetendo immortalitatem, vnde si voluntas nostra non est nisi in anima intellectiua, si appetendo immortalitatem per Aristotelem appetit impossibiles

non ergo anima humana potest esse immortalis:
Quare dicitur ad argumentum non esse euidens
signum illud, quoniam ut ibi dicit philoso-
phus, voluntas naturaliter est impossibile;
cum in impossibili possit saluari ratio boni; &
quod ulterius dicebatur appetitum naturalem
non frustrari; verum est sumendo naturale ut
distinguitur ab intellectiuo, nam illud est opus
intelligentiæ non errantis; unde in quod fer-
tur voluntas sine cognitione, frustrari non po-
test; at si per cognitionem, frustrari potest
nisi sit rectus; presentato enim summo bono
etiam Dijs competente, voluntas fertur in il-
lud esse impossibile; quare ne frustretur oportet
voluntatem esse regulatam per rationem
rectam; licet etiam dicere possemus quod si-
cut mulus medius inter asinum & equum de
utrisque participat, non tamen verè habet
proprietas equi vel asini; sic & anima hu-
mana media inter materialia & immaterialia
affectat aternitatem, licet eam assequi perfe-
ctè non possit; nam & mulus habens omnia
instrumenta ad generationem perfectè eam
consequi non potest, quanquam eam maximè
desideret; undè non inconuenit aliquod natu-
raliter à tota specie frustrari, dummodo se-
cundum genus non frustretur, sicut dictum
est de mulis in quibus frustrantur membra ge-
nerationis, sed saluantur in suo genere, &
talpa oculos habens non videt, sed in anima-
li non frustrantur ut habetur lib. de hist. anim.

E. iiii

quare & humanus animus desiderat immortalitatem quam consequi non potest absolute, sed sufficit quod separata simpliciter consequantur: quare Aristoteles 2. metaphys. comparauit humanum intellectum noctuæ & noctuæ, noctua enim aliquando videt, talpa autem nihil, unde & 9. metaph. tex. vlt. dixit intellectum humanum in cognoscendo abstracta, non esse cæcum, sed cæcutientem: quapropter æternitatem affectat, sed non perfecto appetitu desiderat: Ad verba autem Aristotelis satis patet responsio per ea quæ dicta sunt: vniuersaliter enim corpora cælestia, homines, bestię, & plantę animata sunt, eorumque animę sub vniuersali definitione animę continentur: verum non vno modo: intelligentiæ enim qua actuant corpora cælestia sunt actus corporis physici organici, sed non qua intelligentiæ sunt, etiam & qua actuant nihil recipiunt, sed tantum tribuunt: At humana anima simpliciter est actus corporis physici organici, quoniam nullam habet operationem in qua aliquo modo non dependeat à corpore, etsi non vt subiecto, saltem vt obiecto, unde aliquid recipit à corpore quod non contingebat in intelligentiâ in mouendo corpus, ipsa enim tantum tribuit & non recipit, sensitiua autem & vegetatiua penitus immerse sunt materiæ, licet vegetatiua magis quam sensitiua, quare sunt actus prorsus corporis organici & vt subiecti & vt obiecti; hocque recte & ordinate natura in-

sequitur, sicut enim ab omnino immobilibus quæ sunt intelligentiæ ad corpora cœlestia descendimus quæ tantum secundum locum mouentur, & hæc neque secundum totum, sed secundum partem; post hæc verò ad generabilia & corruptibilia quæ & secundum tota, & secundum omnem modum motus transmutantur, sic & intelligentiæ inter omnes animas minimè sunt actus corporis organici, deinde humanus intellectus, tertio sensus, quarto vegetatiuus; indigere enim corpore quoquo modo non absoluitur ab imperfectione, vnde conuenientissimus est iste ordo: Ad id verò quod de intellectu agente dicebatur quoniam ipse verè est immortalis, quare & passiuus, quandoquidem ambo hi sunt partes essentielles vel potestatiuæ animæ humanæ; hinc dicitur quod verbum illud magis est in oppositum quam in propositum, ibi enim dicit Aristoteles quod solus intellectus agens verè est immortalis & semper est in actu, passiuus verò non, cum quandoque intelligat & quandoque non; quare cum perpetuam non habeat operationem, neque perpetuam habet essentiam, vnde ad rationem dicitur quod intellectus possibilis est secundum quid immortalis, sed ipse agens est verè immortalis, cum sit vna intelligentiarum, neque ipse est pars aliqua animæ humanæ, sicut Themistius & Auerroës existimauerunt, sed tantum motor: Quod autem Aristoteles dixerit esse partem animæ, verum est vt anima communis est intelligentiæ & humano in;

tellectui, ex quo non sequitur quod sit pars animæ humanæ; est enim fallacia consequentis, & hoc est simile ei quod dicitur de materia prima, nam ipsa est susceptiua secundum verum esse omnium formarum materialium, intellectus vero tantum secundum esse intentionale, cum lapsus non sit in anima, sed eius species; verum quod educit de potentia ad actum materiam primam secundum esse formarum, non est aliquid materiæ primæ, neque ei coniunctum secundum esse, sed motor vniuersalis qui natura agens dici potest, sic intellectus humanus cum eam proportionem habeat in genere intelligibilium qualem habet materia prima in genere sensibilibum, ut etiam Themistius & Auerroës consentientur, mouebitur ad suscipiendum omnes species ab aliquo quod non est pars eius, neque ei coniunctum, & hoc dicitur intellectus agens, sicut quod vniuersaliter mouet materiam dicitur mouens naturale; neque verum est quod subiungit Themistius scilicet quod nos sumus intellectus agens, vel quod sit pars nostri ut verè forma, sed tantum ut motor; illa enim copulatio purum figmentum est: Cætera autem quæ vltius adducebantur aut non sunt contra positionem, aut per dicta in alio capite sunt soluta, veluti qualiter intellectus veniat de foris, & remaneat post mortem.

*In quo mouentur tria dubia circa ea
que dicta sunt.*

CAPVT XI.

Circa ea quæ dicta sunt nonnulla oriuntur dubia.

Primum, quoniam dictum est animam humanam vere esse mortalem, secundum quid autem immortalem; istud quidem non videtur esse bene dictum, imò magis dicendum videtur simpliciter esse immortalem, & secundum quid mortalem, superiora enim continent inferiora, & nō inferiora superiora; dicimus enim corpora cœlestia continere ista generabilia & corruptibilia, & non è conuerso; quare cum immortale sit supra mortale magis dicendum est animam humanam simpliciter esse immortalem & secundum quid mortalem, cum immortale contineat mortale, quàm dicamus ipsam esse mortalem simpliciter & secundum quid immortalem, cum mortale non contineat immortale.

Secundum dubium, quoniam si anima est immortalis secundum quid tantum, veligitur verè & propriè est immortalis, vel non verè & impropriè; non primum vt dictum est; neque secundum, quia si impropriè dicitur immortalis, non minùs posset dici quæcunque alia res non sit; nam & impropriè posset appellari canis

vel lepus: Cur igitur magis dictum est quòd sit immortalis quàm canis vel lepus, cum immortale improprie de ea dicatur.

Tertium dubium est, quoniam tota radix huius positionis innititur ei fundamento, scilicet quòd intellectus humanus non habet nisi vnum modum intelligendi, sicut & sensus & intelligentiæ vnum modum cognoscendi; modus autem ille est medius inter modum cognoscendi abstractorum simpliciter & animæ sensitivæ, cū de utroque participet, vt enim vniuersaliter cognoscit, conuenit cum abstractis, vt verò tale vniuersale non speculatur nisi in phantasmate & singulari conuenit cum sensu, cum totaliter non cognoscat sine materiæ appenditijs; quare concludebatur medius inter materialia, verùm hoc dubitationem facit, quoniam si talis dependentia cognitionis intellectus à phantasmate est speculari vniuersale in singulari, tunc intellectus cognosceret singulare, quod à multis negatum est: Dicunt enim aliqui singulare materiale per solum sensum cognosci posse, vel dato quòd concedamus intellectum cognoscere singulare, multis tamen videtur quòd nisi reflexe cognosci potest, vt 3. de anima tex. 10. videtur dicere Aristoteles, verùm & hoc concessio, cum ista reflexio non potest imaginari nisi quidam discursus, vt ferè omnes interpretantur, qui discursus non fit nisi in tempore, & post simplicium cognitionem: Ergo ante cōpositionem & diuisionem, & consequenter, discursum, speculabi-

tur vniuersale & non in singulari : ergo positio
falso innititur fundamento.

*In quo ad dubitationes istas respon-
detur.*

CAPV.T. XII.

AD primam igitur dubitationem dicitur
longè distare continere à participare: con-
tinere enim se habet per modum formæ, & con-
tineri per modum materiæ, quare continens est
perfectum & superexcellens, ipsum autem cō-
tentum est imperfectum & excessum; verum
è contrario est de participante & participa-
to, participatum namque se habet per mo-
dum causæ & excedentis, participans verò
per modum effectus & excessi, quare non con-
uenienter dicimus intellectum humanum con-
tinere diuina & immortalitatem, verum è cōtra;
sed rectè dicimus intellectum humanum parti-
cipare de diuinitate & immortalitate, & non
è contra, quare Aristoteles 1. de part. cap. 10.
non dixit, solus homo diuinitatem & immorta-
litatem continet, sed dixit, solus homo diuini-
tatis & immortalitatis est particeps, vel maxi-
mè; quod verbum additum est, quia & cætera
mortalia de diuinitate participant; nam in om-
nibus naturæ numen est, vt idem dicit Aristote-
les ex Heracliti sententia 1. de part. cap. vlt. Ve-

rùm cetera mortalia non tantùm sicut homin-
idem quoque repetit 4. de part. cap. 9. quapro-
pter ratio cogebat quod intellect^{us} humanus im-
mortalitatem non contineret, non autem quòd
immortalitatem non participaret, quod poni-
mus, scias etiã quod sicut aliquid verè mor-
tale immortalitatis est particeps, imò omne
productiuum sibi similis est sic immortalitatis
particeps, sicut dicitur 2. de animatex. 34. &
35. Ita aliquid immortale mortalitatis & cadu-
ci videtur particeps; Commentator enim 2. de
cælo com. & 49. reddens causam de macula lu-
næ dicit hoc esse, quia luna est de natura terræ,
citaturque Aristotelem lib. de anim. verùm mani-
festius hoc dicit lib. de proprietatibus elemen-
torum, ponit enim cetera elementa ab alijs er-
raticis participari, non igitur incōuenit & morta-
le immortalis, & immortale mortali participare.

Ad secundam dubitationem dicitur quòd et-
si inter propriè & impropriè non datur medium,
tamen per participationem proprietatum datur
medium, sicut licet inter substantiam & acci-
dens non datur medium, nihil enim est quod
non sit vel substantia vel accidens; tamen ali-
quid ponitur participare de proprietatibus v-
triusque, sicut & moueri secundùm partem po-
nitur medium inter moueri per se & moueri per
accidens, vt dicitur 5. phys. quare animus hu-
manus etsi impropriè dicatur immortalis, quia
verè mortalis est, participat tamen de proprie-
tatibus immortalitatis, cum vniuersale cognos-
cat, tametsi eiusmodi cognitio valde tenuis & ob-

seura sit ; nō sic autē est de cane & lepore quantū ad istam operationem : Quare obiectio ibi facta cessat : Quod si dicatur nos multū vilificare intellectum humanū, cum ipsum vix vmbra intellectus affirmamus; hinc quidē dicitur, quod verē comparādo ipsum intelligentijs vmbra est: Quod etiam docet Aristoteles , & in erratis de anima & 2. metaph. Non enim verē appellatur intellectualis, sed rationalis; intellect' enim simplici intuitu omnia intuetur: At ratiocinatio discursu, compositione, & cū tempore, quæ omnia attestantur super imperfectione & materialitate eius; sunt enim hæ conditiones materiæ: Si verò ipsum humanū intellectum comparaueris ad cætera generabilia & corruptibilia primum gradum nobilitatis obtinebit, quanquā corpus imbecillissimū & ferē infinitis infirmitatibus obnoxium deteriorisq; conditionis quā sint ferē omnes bestię, vt optimē Plinius lib. 7. natur. hist. manifestat: Adde insuper quod homo, vel est subiectus, vel alijs dominatur; si subiectus est cōsideret pessimam suam sortem, cum vix de mille millibus dominantibus vnus mediocris virtutis reperiatur, imò quasi semper in potestate constituti sunt amentes, ignorantes, omniq; vitijs genere referti quā dura autem sit huiusmodi sors satis liquet, cum nullum genus animalium sic ab aliquo suæ speciei prematur; si verò alijs dominetur, quā iniqua sit tyrannis satis abundē & Plato de Repub. & Aristoteles in Polit. declarāt, ponuntque longe deteriorem esse tyrannidis conditionem quā subiectū

quacumque subiectione: Quicumque igitur tantum magnificat hominem, non consideret ea quæ non experitur, sed ea quæ scit & ante oculos habet.

Ad tertiam autem dubitationem dicendum est quod quidam grauissimi interpretes D. Thomæ exponentes articulum 7. quæst. 84. primæ partis summæ, ubi de hac conuersione tractat D. Thomas, dicunt singulare reflexè intelligi, & quod huiusmodi reflexio est quædam argutio, dicuntque quod vniuersale non cognoscitur in aliquo singulari verum in aliquo particulari, verbi causa quod homo non cognoscitur in Socrate vel in Platone, sed in aliquo homine: aliquis autem homo ad hominem se habet infra terminos primi modi dicendi per se, & quamuis non sit primò in tali modo, est tamen infra limites eius, sicut se habent perfectum & imperfectum ad vnamquamque rem; neque homo est prior aliquo homine, cum conuertatur subsistendi consequentia, nam si homo est, est aliquis homo, & si aliquis homo est, homo est, quod esse non potest si homo esset prior aliquo homine: hæc autem dicta apud me sunt valde ambigua, & primò quidem quod homo cognoscitur in aliquo homine, sed non in Socrate, neque in aliquo singulari, istud quidem in primis videtur esse contra experimentum; quoniam quantumcunque immateriale vel vniuersale cognoscamus semper nobis formamus aliquod idolum in cogitativa in quo illud speculamur, vt & D. Thomas ibidem dicit, modo tale idolum est quoddam

dam singulare & singulariter repræsentans, ratioque ad illud tendit, nam vult probare nos intelligere per cōuersionem ad phantasmata quod fingi non potest nisi singulare; quoniam homo est in Socrate, & equus in hoc equo; etenim hæc sunt eius verba, quare ex eo quod homo est in hoc singulari, ideo cognoscit in hoc phantasmate, aliter enim probatio non esset conueniēs: non enim ex eo quod est indifferenter in aliquo homine cognoscit in hoc phantasmate, & certè huius interpretis dictum literæ contradicit, sic enim stat litera, cognoscit in aliquo Individuo quod manifestat per verba subsequētia, sequitur enim, natura humana est in hoc homine, & equina in hoc equo: Amplius difficilimum est apud me intelligere illam argumentationem, cū hoc quod mihi videtur multipliciter deficere; nam ex primo priorum omnis vera argumentatio habet aliquam propositionem vniuersalem, quoniam singulare ex singulari infertur, vniuersalis autē propositio inductione habetur, vt 1. & 2. post. patet: Inductio autem est singularium, vt satis notum est; quare in cognitione singularis præsupponitur singularis cognitio: Amplius si ad intellectionem Socratis indigemus illa obscurissima arguitione quam ipse dicit, tunc magnum tempus apponeretur ad cognoscendum Socratem post hominis cognitionem, ego quoque fateor me intelligere Socratem esse hominem, nihilque de illa arguitione intelligo, puerique & idiotæ discursu carentes nescirent hoc esse hominem

F

& illud canem, cum arguitionem illam non habeant: Præterea aliquis homo secundum ipsum non est singulare licet determinet hominem, sed nihil videtur in aliquo homine esse determinatiuum hominis nisi illud synecategorema (aliquis) quod non videtur, cum in se plus habeat quàm homo, & tamen determinans debet se habere in minus quàm determinatum: Præterea quod ipse dicit hominem & aliquem hominem esse simul, quoniam mutuò se inferunt; verùm eodem argumento si omnia singularia contenta sub homine accipiantur eodem modo sub disiunctione se inferent cum subsistendi consequentia; nemini tamen dubium est quod homo secundum intellectum est prior singulari, quamvis non secundum rem, & de prima est sententia: Porphyrius namque in communitatibus probat genus prius esse differentiis & speciebus, quoniam sublato genere nec sunt species nec differentie, verùm ipsis sublati non aufertur genus, quod equidem intelligi nequit secundum rem, sed tantum secundum intellectum: Quare mihi dicendum videtur quod intellectus intelligit hominem in singulari indeterminatè tamen; quoniam etsi nunc intelligo hominem in Socrate, possum tamen & in Platone, & in quouis alio, dummodo sit in aliquo singulari; sicut omne corpus est in vno loco singulari, indeterminatè tamen, diciturque quòd simul tempore cognoscit universale & singulare, licet prius natura vniuer-

fale, quanquam non defint qui fingulare prius
intelligi affirmant, & vt exiftimo nedum natu-
râ verum & tempore, cum ponant vniuerſalis
cognitionem per comparationem fingularium
haberi; verum pro nunc cum prima opinio-
ne tranſeamus: Cumque dicebatur quod ſingu-
lare non cognoscitur niſi reflexè ex 3. de anima,
quamuis Themiftius & Auerroës ſic illa ver-
ba non interpretantur; verum hoc nunc con-
ceſſo dicimus verè & propriè talem intellectio-
nem eſſe reflectionem & conuerſionem ad phā-
taſmata, vt verbis D. Thomæ utar quod aper-
tum eſt videre, nam 8. de phyſico auditu in ea
parte in qua oſtendit motus reflexos non con-
tinuari, deſinit motum reflexum eum eſſe qui in
idem terminatur à quo incepit; verum cum ani-
ma humana per cogitativam comprehendit ſin-
gulare primò, deinde eadem per intellectû vni-
verſale comprehendat quod tamen in eodẽ ſin-
gulari ſpeculatur quod per phantaſiam cognitû
eſt, verè reditum facit, & per conſequens con-
uerſionem, quoniam ex ſingulari per phantaſiam
cognito, eadem anima per intellectum ad idem
redit; neque ſatis video quomodo ſyllogiſmus
vel argumentatio reflexio vel cõverſio commo-
dè nuncupari poſſunt, cum non ex eodẽ in idem,
verum ex diuerſo in diuerſum procedant, eadẽ-
que ſpecie vtrumque comprehenditur, licet non
æquè primò; neque inconuenit plura ſimul in-
telligi dum per vnam ſpeciem intelligantur; ma-
gis autem hoc quàm illud ſingulare comprehen-
dit, quoniam huius eſt phantaſma, nō illius; etc.

nim ex huius leonis inspectione leonē & hūc leonē intelligo, nō tamen magis leonē & hoc quā ex illo qui moratur in syluis : etenim si illum inspicerem non minū leonem intelligerem, verū hunc intelligo & non eum qui in syluis, quia huius & non illius phantasma habeo, quare fundamentum stat.

In quo multe arduæ difficultates mouentur aduersus id quod dictum est.

CAPVT XIII.

VERū aduersus positionem hanc maiores difficultates insurgunt, quibus quantum video satisfacere non leue est.

Primò, quia si anima humana est mortalis, quemadmodum conclusum est, tunc non dabitur vltimus finis hominis quā homo est, & sic nō erit felicitabilis; sed huius oppositū ponitur ab Aristotele 1. ethic. vt satis liquet : Est etiam contra commune dictum, vbi dicitur quòd homo est animal felicitabile, cū sit rationis capax : Quod etiam patet ex suo opposito, cum 2. phys. differtur fortunium seu infelicitas non cadit in bestias, sed tantū in rationalia : Ergo anima non est mortalis : Omnia patent excepta conditionali quæ est maior propositio, scilicet quòd si esset mortalis non esset vltimus finis hominis quā hominis, quæ sic probatur : quoniam si quis esset vltimus finis talis cum in parte vegetatiua &

ſenſitiua ; neque in bonis corporis vel fortunæ poni poſſit , vt ſatis ſtriſtè Ariſtoteles 1. ethic. demonſtrat , & Boetius copioſe 2. & 3. de conſolatio. & D. Thomas lib. 3. contra Gētiles : Ergo in bonis animi ſeu eius virtutibus poneretur eius felicitas : Verū cum virtutes animi diuidantur in morales & intellectuales , & in moralibus felicitas poni non poſſit , vt citati viri lucidè oſtendunt , reſtat quòd in intellectualibus ; Diuiſis autem intellectualibus in ſuas partes , vt 6. ethic. patet , in nulla videtur rationabiliter poni poſſe felicitas , præterquam in habitu ſapientiæ , quæ præcipuè de Deo contemplatur , ſicut plana videtur Ariſtotelis ſententia 10. ethic. ſed & hoc ex multis rationibus reſellitur : Primo quidem , quoniam talis cognitio exigit hominem valde excellentis ingenij , & præter hoc totaliter abdicatum à rebus mundanis , bonæ naturæ , ſcilicet ſanæ , & non indigentem neceſſarijs ; verū tales rariffimi eſſe poſſunt , etiam in longis ſæculis vix vnus reperitur , quod docet quotidiana experientia , & hiſtoriæ declarant ; hoc autem repugnat rationi felicitatis , quia eſt bonum conueniens cuiſlibet homini non orbatò , cū quilibet homo naturaliter eam deſideret : Amplius quoniam talis cognitio valde debilis eſt , & multum incerta , cum magis ſit opinatiua , quàm ſcientifica ; quod declarant diuerſæ opiniones ; cum vix duo in talibus reperiantur conſentientes , noſtérque modus intelligendi idem demonſtrat , qui eſt per ſenſus , & talia remotiſſima

sunt à sensibus : quo fit vt magis ignorantia
quàm cognitio , & suspicio quàm certitudo
debeat appellari ; quis autem hanc ponet esse
felicitatem cum in felicitate quiescimus , in
hac vero titubamus & non quiescimus ? In-
super felicitas rationem habet termini , hæc
verò tota est in via cum nullus tantum sciat
quantum scire potest , imò quantò magis scit
tantò magis scire desiderat : Præterea ad istam
capessendam , quot artes , quot scientiæ , quot
labores , quot vigiliæ sunt requisitæ , quare cū vix
vita sufficiat pro vna arte capessenda , quomodo
ad talem finem peruenire poterit ? Cūque
quis intuebitur quàm incertus sit de vita sua
de viribus suis , de euentibus potentibus eum
impedire & tollere eum de medio , quomo-
do tantum & tam difficile iter aggreditur ?
Amplius cū tempus generationis talis felici-
tatis sit maximum , viæque perueniendi dif-
ficillima , oportet enim hominem se quasi to-
tum abdicare à corpore , cum sit in corpore ,
& dubius est de euentu : & etiam postquam
peruenerit in momento eam amittere , vel mo-
riendo , vel insaniendo , vel ex aliquo alio casu ,
quomodo igitur ista nō veriùs nuncupabitur in-
felicitas quàm felicitas ? Quare non irrationabili-
ter multi dixerunt si anima humana mortalis est
longè deteriore esse conditionem hominis
quàm bestia cuiusvis , inspecta hominis imbecil-
litate quantum ad corpus , quod tot infirmitati-
bus est subiectum , & animi inquietudine qui
semper huc atque illuc vertitur .

Secundò quia stante animi humani mortalitate, homo in nullo casu quantumcunque urgentissimo deberet eligere mortem, & sic remoueretur fortitudo quæ præcipit cõtemnere mortem, & quòd pro patria & bono publico debemus mortem eligere, neque pro amico debemus exponere animam nostram, imò quodcunque scelus & nefas perpetrare magisque mortem subire, quod est contra Aristotelem 3. ethic. & 9. eiusdem; & contra naturam, cuius signum est quod naturaliter odimus ista facientes etiam pro eorum vita tuenda, eosque vituperamus, naturaliter autem contraria facientes amamus & laudamus. Quòd autem hoc sequatur satis patet, quia electio habet rationem proprii boni, modò mors totum bonum destruit, nihilque in ea est eligibilis; quod etiam patet ex Platone in Phedone, ubi testatur mortem æquo animo non esse ferendam nisi spes esset de meliori vita; dicit quoque 5. de legibus, qui hanc vitam summum bonum censet eam dedecorat: D. Thomas etiam 3. ethic. quasi dubitat quomodo ponentes animam esse mortalem possunt eligere mortem, & in expositione symboli Apostolorum dicit super parte illa (carnis resurrectionem) quòd proculdubio nisi esset spes resurrectionis quodcunque flagitium esset potius perpetrandum quàm moriendum.

Tertiò, quia sequitur aut Deum non esse gubernatorem Vniuersi aut iniquum, quorum utrumque scelus est: nam si non omnia gubernaret non esset Deus, & si Deus summum

bonum, cum nihil potentialitatis habeat, & si summum bonum, quomodo in eo iniquitas? Hoc autem apertum est videre, quia tot mala in hoc mundo sunt quæ ignota hominibus sunt, & si nota impunita relinquuntur imò sæpe pro malo maxima bona reportant: è contra de bonis qui vel non cognoscuntur, vel si cognoscuntur remanent sine præmio, & multoties mortem & damna sustinent; hæc autem vel non cognoscit Deus, vel si cognoscit, & sic impunita vel sine præmio relinquat, sicut dicit Hieronymus Deus non est.

Quartò, quia omnes leges tam quæ fuerunt quam quæ sunt ponunt animam post corpus remanere, & sic hoc est maximum famosum & in toto orbe celebratum; quare vel oportet dicere animam esse immortalem, vel quòd totus mūdus decipitur, famosumque ex toto esset falsum, quod tamen Philosophus in de somno & vigilia negat.

Quintò, quia multa sunt experimenta per quæ euidenter comprehendi potest eius immortalitas; Plato namque in Phedone refert, quòd circa monumenta visa sunt phantasmata umbrōsa animarū, & hæc sunt animæ malorū hominū; dicit etiā 9. de legibus occisorū animas sæpe interfectores hostiliter insequi, propter quod aliqui existimauerunt ad præsentiam interfectoris vulnera sanguinem emittere; refert quoque 10. de Repub. quendam Pamphilum à mortuis surrexisse qui de pœnis & malorum cruciatibus horrenda referebat: Plinius quoque

iunior narrat Athenis infamem fuisse domum in qua & simulachrum horridi senis aspiciebatur, & strepitus audiebatur, atque Athenodorum Tharsensem philosophum simulachrum illud vidisse conductâ domo, eoque duce comperisse in area domus sub terra ossa inserta catenis, & sicut mos erat sepelisse, domum deinde illam à strepitu liberatam: refertque Possidonius Stoicus quod duo quidam Arcades familiares cum Megaram venissent, alter ad cauponam diuertit, alter ad hospitem, qui ut cœnati quieverunt, nocte visus est in somnis ei qui erat in hospitio ille alter orare ut subueniret quod sibi à caupone interitus pararetur, hic primo territus somno surrexit, deinde cum se collegisset, idque visum pro nihilo habendum duxisset recubuit, tum ei dormienti ille idem visus est rogare ut quoniam sibi viuo non subuenisset, mortem suam saltem ne inultam esse pateretur, se interfectum à caupone in plaustrum esse coniectum, & supra stercus iniectum petere ut mane adesset ad portam priusquam plaustrum ex oppido exiret; hoc ergo somnio commotus, mane bubulco præsto ad portam affuit, quæsiuit quid esset in plastro, ille perterritus fugit, mortuus erutus est, caupo re patefacta pœnas dedit. Simonides quoque cum ignotum quendam proiectum mortuum vidisset eumque humasset, haberetque in animo nauem conscendere, moveri visus est ne id faceret ab eo quem sepultura affecerat, si nauigasset naufragio periturum, redijt Simonides, cæteri naufragium fecerunt; in-

finitaque huiusmodi adduci possent: Testor ego quoque me multa per somnia habuisse, quæ quasi consilia sunt, quare animas defunctorum esse apertè hæc videntur declarare.

Sextò, quia multa leguntur, & experientia sentiuntur, quòd quidam à dæmonibus vexantur, qui & præterita & futura prænuntiant, referuntque se esse animas aliquorum defunctorum: experimenta autem negare est impudentiæ & vesaniæ.

Septimò, quia & Aristoteles videtur ponere animas immortales, tum quia 1. Ethic. dicit propotum infortunio aliquid facere ad animas defunctorum, tum quia ponit eas præmiari post mortem, nam lib. 2. œconom. cap. 2. sermonem faciens de Alceste & Penelope dicit quòd factæ in malis fideles sibi præparauerunt gloriæ immortalem, & iustè à viris honoratæ sunt, neque à Dijs sunt immeritæ.

Octauò, quia omnes huius sententiæ sectatores fuerunt & sunt viri impijssimi & scelestissimi, sicut Epicurus ignauus, flagitiosus Aristippus, insanus Lucretius, Diagoras dictus Athenis Epicureus, bestialissimus Sardanapalus, & omnes quorum conscientia premitur à flagitiosis criminibus: At contra viri sancti & iusti quorum immaculata est conscientia asseuerentur eam immortalem pronuntiant: Quare Plato epist. ad Dionysium quæ incipit, Audiui ex Archedemo, vbi sic dicit, sit enim natura quædam vt ignauissimi homines nihil curent quæ sit de ipsis futura opinio, probatissimi autem

vin cuncta faciunt quò in futuris sæculis bene de se loquentes homines audiant : quam ego coniecturam facio esse aliquem sensum his qui mortui sunt rerum nostrarum, quoniam optimi animi sic fortè diuinant, deterrimi nequaquam: validiora verò sunt diuinorum virorum præfagia quàm aliorum.

In quo ad obiecta respondetur.

CAPVT XIII.

ARduum quippe & onerosum mihi videtur his argumentationibus satisfacere, & eò præsertim, quoniam famosum est animam post mortem remanere, & vt 2. metaph. scribitur difficile est contra consuetudinem loqui, verùm quantum dabitur facultas in hac materia, saltem probabiliter dicere conabimur.

Pro responsione igitur ad primum, sciendum est quod vnaqueque res saltem perfecta habet aliquem finem, cùmque finis boni rationem obtineat vt dicitur 2. metaph. non tamen quod est magis bonum debet vnicuique rei pro fine assignari, sed solum secundum quod conuenit illi naturæ & ei proportionatur : nam etsi sentire melius est quàm non sentire, non tamen lapidi conuenit sentire neque esset bonum lapidi, sic enim non amplius esset lapis, quare assignando finem homini si talem qualem

Deo & intelligentijs assignaremus non conueniens foret assignatio, quandoquidem sic non esset homo: Secundò accipiendum est & maxime memoriæ mandandum, quod totum genus humanum vni singulari homini comparari potest, in vno autem indiuiduo humano sunt multiplicia & diuersa membra, quæ & ad diuersa officia siue diuersos fines proximos sunt ordinata, cum hoc tamen quòd omnia ad vnum finem deputata sunt; quare omnia illa in aliquibus debent communicari; quòd si ordo iste præuariicaretur, aut homo non esset, aut incommode esset; omnia verò membra ordinantur in communem vtilitatem ipsius hominis, & aut vnum est necessarium altero, & è contrà, aut saltem vtile, licet aliquando & illud magis, illud verò minus; vnde cor necessarium est cerebro, & cerebrum cordi, corque necessarium est manui, manus verò utilis cordi; & dextera utilis sinistra, & sinistra dextræ, omniâque membra communicant in vita & naturali calore, indigentque spiritu & sanguine, sicut ex libro de animalibus apertum est videre; vtrâque hæc in quibus communicant singulum membrum singulare habet officium, cor enim vnum, cerebrum alterum, hepar aliud, & sic de residuis, vt eodem lib. de animal. declarat Aristoteles, verùm copiosius Galenus libro de vtilitate particularum: hæc autem officia siue opera non sunt æqualia, verùm vnum prius, & alterum posterius, vnum perfectius, & alterum imperfectius; nam secundum Aristotelem cum cor sit nobilif-

sumum & primum, ideo & officium eius est nobilissimum & primum, & sic de reliquis discurrendo; & quantumcumque cerebrum verbi causa non sit ita perfectum sicut cor, in suo tamen genere potest esse perfectum: quare sicut omnia membra inter se habent latitudinem & diuersitatem, ita vnumquodque genus membri, infra tamen certos terminos; etenim neque omnia corda sunt æquè magna vel consimiliter calida, & sic de residuis membris; illud quoque obseruandum est quod quantumcumque inter ista membra sit tanta diuersitas non tamen ea & talis vt discordiam pariat, sed debet esse commensurata diuersitas; quod si ultra modum fiat, aut perditio individui, aut ægritudo consequitur; si etiam non esset illa commensurata diuersitas, indiuiduum minimè constare posset; etenim si omnia membra essent aut cor, aut oculus, animal non esset, veluti in symphonijs & concentibus si omnes voces essent vnius ordinis non causaretur concentus & delectatio, talitèrque disposita sunt vt neque vniuersum indiuiduum, neque aliqua eius pars meliori modo potest esse disposita quàm sit, sicut Plato in Timæo dixit quod Deus dedit vnicuique quod optimum sibi & vniuerso: Eodem itaque pacto censendum est de toto genere humano; vniuersum namque humanum genus est sicut vnum corpus ex diuersis membris constitutum quæ & diuersa habent officia, in communem tamen vtilitatem generis humani ordinata, vnumque tribuit alteri, & ab eodem cui tribuit recipit, recipiendū.

que habent opera; neque omnia possunt esse æqualis perfectionis, sed quibusdam data sunt perfectiora, quibusdam verò imperfectiora; hæcque inæqualitas si tolleretur, aut genus humanum periret, aut non commodè constaret; habent tamen aliqua in quibus omnia aut ferè omnia communicant, secus enim non essent partes vnius generis, & ad vnum commune bonum tendentia, sicut de vnius singularis hominis membris dicebatur; Neque inæqualitas inter homines, commensurata tamen, debet discordiam parere; imò sicut in symphonia vocum commensurata diuersitas concentum delectabilem facit; sic commensurata diuersitas inter homines perfectum, pulchrum, decorum, & delectabile generat; incommensurata verò contrarium: his igitur sic digestis, dicamus quòd omnes homines ad huiusmodi finem communem consequendum debent in tribus intellectibus communicare, scilicet speculatiuo, practico, & factiui; nullus enim homo est non orbat, & in ætate debita constitutus, qui aliquid horum trium intellectuum non habeat; veluti nullum est membrum quod sanguine & calore naturali non participat: vnusquisque etenim homo habet aliquid de speculatione, & fortè in vnaquaque scientia speculatiua, quia saltem principia quæ vt 2. metaph. dicitur sunt sicuti ianua domus, quas nullus ignorat, quis enim est qui prima principia ignoret? veluti de quolibet dicitur esse vel non esse, non contingit idem simul esse & non esse, quis omnino Dei ignarus, entis,

vnus, veri, boni? & sic de reliquis, quod nimis
onerosum esset percurrere, hæc autem ad me-
taphysicam pertinent: De naturali quoque ma-
nifestum est, cum ista subiaceant sensibus quæ
primò intellectui occurrunt; in mathematica
quoque illud clarum est videre, cum sine nume-
ris & figuris vita humana duci non possit, om-
nesque homines, horas, dies, menses, & an-
nos cognoscunt, multaque alia quæ sunt Astro-
nomici negotij, non minúsque nisi cæcus sit ali-
quid de visionibus cognoscit, quod est opus per-
spectivæ, nisi que surdus sit de concentib. quod
ad musicam spectat, quid dicam autem de Rhe-
torica & dialectica? quandoquidẽ Aristoteles in
proemio Rhetoricæ dicat, propter quod & mo-
do quodam omnes participant ambabus: De
intellectu autem operatiuo qui est circa mores,
respublicas, & res domesticas illud quidem
apertissimum est, cum vniciuique datum sit bo-
num & malum cognoscere, esse partem ciuita-
tis & familiæ, etenim huiusmodi intellectus ve-
rè & propriè humanus nuncupatur, vt Plato
in de re publica, & Aristoteles in ethicis testan-
tur: De factiuo autem intellectu illud in pro-
patulo est, quandoquidem nullus homo sine
hoc vitam degere potest: etenim sine mecha-
nicis & necessarijs ad vitam homo non po-
test durare, verùm scire oportet quod tamen
si vnusquisque homo de tribus enumeratis
intellectibus ex toto non priuetur, non tamen
homo æqualiter se habet ad hos: Nam spe-
culatiuus intellectus non est hominis, sed Deo-

rum vt tradit Aristoteles 10. Ethic. & Plato in Timæo, maximum donum Deorum est philosophia; quare nullo pacto in hoc homo cum ceteris mortalibus communicat; Ideo etsi homines omnes aliquid huius habent, exactè tamen & perfectè paucissimi & habent & habere possunt, propter quod contingit quod ea pars generis humani quæ se totam speculationi tradit eam proportionem tenet in genere hominum quàm cor in genere membrorum, quamquam & latitudo sit vt quidam mathematici, quidam physici, quidam medici, quidam verò metaphysici sint, interquæ omnes istos modos est latitudo, sicut satis liquet: intellectus autem factiuus qui infimus & mechanicus est omnibus quidem hominibus est communis, imò & bestię hoc participant, vt docet Aristoteles li. de hist. animal cū multæ bestię easas construant, multaque alia quæ intellectum factiuum prætendunt, hîcque maximè necessarius est, adeo vt maior pars hominum circa hunc detenta sit; quare fœmineus sexus ferè ex toto huic incumbit, vt texere, filare, suere, &c. maximaque hominum pars agriculturæ vacat, deinde diuersis artificijs; neque qui vni incumbit, alteri artificio commodè incumbere potest; quapropter Plato in de repub., & Aristoteles in polit. iusserunt vt quemadmodum vnum membrum commode non exercet diuersa officia, sic nec vnus artifex diuersis artificijs vacare debet, neutrum enim consequetur, operatiuus autem intellectus vere conuenit homini & vnusquisque
homo

homo non orbatuſ perfecte eum conſequi po-
teſt, & ſecundũ eum ſimpliciter & abſolute
homo dicitur bonuſ & maluſ: ſecundũ verò
ſpeculatiuum & factiuum niſi ſecundũ quid,
& cum determinatione: ſecundũ namque vir-
tuteſ & vitia homo dicitur bonuſ homo, & ma-
luſ homo: at bonuſ metaphyſicuſ non bonuſ
homo dicitur, ſed bonuſ metaphyſicuſ: bonuſ-
que domificator non bonuſ abſolutè, ſed bonuſ
domificator nuncupatur: quapropter homo non
indigne fert, ſi non metaphyſicuſ, phyſicuſ, vel
faber appelletur: at ſi fur, intemperatuſ, iniu-
ſtuſ, impradenuſ, vel aliquid huiuſmodi vitioſu-
m dicatur, maximè indignatur & exandefcit,
tanquam eſſe ſtudioſum vel vitioſũ humanũ ſit,
& in noſtra poteſtate repoſitũ; At eſſe philoſo-
phum, vel domificatoreſ nò noſtrum eſt, neque
homini neceſſariuſ; Quo fit vt omneſ homineſ
poſſint & debeant eſſe bene morigerati, non
autem omneſ philoſophi, mathematici, domi-
ficatoreſ, &c. neque enim conſtaret genus hu-
manum niſi eſſet tanta diuerſitaſ, ſicut ſupra
de membris dictum eſt: Redeunteſ igitur ad
propoſitum dicimur quòd finiſ generiſ humani
in vniuerſali eſt participare de illiſ tribuſ intel-
lectibuſ, ſecundũ quos etiam homineſ inter
ſe communicant & viuunt; & vnus alteri aut
eſt utiliſ aut neceſſariuſ, ſicut omnia membra
in vno homine communicant in ſpiritu vitali, &
habent operationeſ mutuáſ inter ſe; & ab hoc
fine homo abſolui non poteſt: verũ quantum
ad intellectum practicũ qui propriè hominiſ

G

est, quilibet homo perfectè debet habere: Ad hoc enim vt genus humanum rectè conseruetur, quilibet homo debet esse virtuosus moraliter; & quantum possibile est carere vitio, sibi-que imputatū est vitiū tanquā suum in quocunque statu reperiatur, siue egenus, siue pauper, siue diues, siue mediocris, siue opulentus; De alijs autem intellectibus non est necessarium, imò neque possibile, neque conuenit generi humano; non enim constaret mundus si quilibet esset speculatiuus, imò neque ipse, cum impossibile sit vnum genus hominum vtpote physicum sibi esse sufficiens; neque esse tantum domicatorū genus, vel aliquid huiusmodi, neque fieri potest vt vnum perfectè exerceat opera alterius, nedum omnium sicut contingit in membris; quare vniuersalis finis generis humani est secundum quid de speculatiuo & factiui participare, perfectè autem de practico; vniuersum enim perfectissimè conseruaretur si omnes homines essent studiosi & optimi, sed non si omnes essent philosophi, vel fabri, vel domificatores; neque ita est in virtutibus moralibus sicut in artibus & scientijs, quòd vna impediatur aliam, & incumbere vni impediatur incumbere alteri; verum vt dicitur in ethicis, virtutes morales sunt connexæ, & qui perfectè habet vnā habet omnes; quare omnes debent esse studiosi & boni, esse verò philosophum, mathematicum, architectum sunt fines partiales, sicut cerebrū habet proprium officiū, & hepar suum, neque ista inæqualitas in genere humano debet

parere inuidiam & lites inter ea, sicut neque diuersitas in membris, imò vnionem & pacem, maximè cum quilibet debet esse moralis à quo talia relegata sunt; & sicut vnumquodque elementū secundū totū categorematicè est debitè situatum, aliqua tamen pars ipsius melius quàm alia; non enim quælibet pars ignis tangit sphaeram lunæ, nisi vt toti coniuncta est; neque quælibet pars terræ est centrum mundi, nisi ratione totius; ita non quilibet habet vltimum finem qui conuenit parti nisi vt pars generis humani, sufficit autem habere communem finem humanum; quapropter ad rationem dicitur quod si homo mortalis est, quilibet homo potest habere finem qui vniuersaliter conuenit homini, qui tamen competit parti perfectissimæ non potest neque conuenit, sicut non quodlibet membrum potest habere perfectionem cordis & oculi, imò non constaret animal; sic si in quolibet homo esset speculatiuus, non constaret communitas humana; quare & plura climata, & diuersæ regiones sunt necessariae; felicitas igitur non stat in habitu speculatiuo per demonstrationem, tanquā cōueniens vniuersaliter generi humano, sed tanquā primæ parti principali eius; & quantumcumq; ceteræ partes ad talē felicitatem peruenire non possint, non tamen ex toto priuantur felicitate, cum aliquid speculatiui, & aliquid factiui habere possint, perfectèque practici, qui habitus quasi vnumquemque beatificare potest Agricola. n. vel faber, egenus, vel diues, si moralis sit, felix nuncupari potest, & vere nuncupatur,

fortéque sua contentus abibit; cum hoc quod etiam præter felicitatem moralem potest appellari felix agricola, vel felix domificator, si feliciter in agricultura operetur, vel in construenda domo; licet non tam propriè propter hoc felix nuncupetur; hæc enim non sunt in potestate humana, sicut viututes & vitia; non igitur genus humanum à suo fine frustratur, nisi seipsum talem faciat; & quod vltèrius addebatur, quoniam talis speculatio non videtur posse facere hominem felicem cum sit valde debilis & obscura; huic dicitur quod tamen si in ordine ad æterna huiusmodi sit, & ad eam quæ intelligentiarum, tamen inter res morales nihil excellentius haberi potest, sicut Plato in Timeo dixit; neque mortalis immortalem felicitatē appetere debet, quoniam immortale mortali non conuenit, sicut ira immortalis non conuenit homini mortali, vt 2. rhetor. dicit Aristoteles; quare primò supposuimus quod vnicuique rei proportionatus finis assignetur; si .n. homo sit temperatus non impossibilia appetet, neque sibi conueniunt, talem enim habere felicitatem est proprium Deorum qui nullo modo à materia & transmutatione dependent; Cuius oppositum contingit in humano genere quod est medium inter mortalia & immortalia; & cum vltèrius dicebatur quia finis debet quietare, hoc autem hominis intellectum & voluntatem non quietat: huic dicitur quod Aristoteles in fine 1. ethic. non ponit felicitatem humanam tanquam perfectè quietantem, unò ponit quod quantuncumque homo sit felix,

non tamen tam stabilis est quin multa perturbent ipsum, non enim esset homo, verum non remouent à felicitate, sicut non quiuus ventus euellit arborem, licet moueat folia: Quare in humana felicitate sufficit stabilitas non remouibilis, licet aliququaliter conturbabilis, imò quod plus est & in quacunque ætate: in iuuenili enim si exactam non habet cognitionem quæ in virili congruit, dummodo habeat iuuenili congruentem contentus est pro illa ætate, neque amplius appetit quàm sibi conueniat, quare neque angustiaabitur vt dicebatur: & cum vltèriùs procedebatur quod nunquam tanta scit quanta scire potest; nec tam clarè quin clariùs: dico quod hoc non tollit felicitatem eius, dummodò tantum habeat quantum sibi pro illo statu conuenit, & ex parte sui non deficiat: Nam temperati appetitus est tantum appetere quantum digerere potest: ita temperati, est contentari eo quod sibi conuenit & habere potest: & cum vltèriùs adiungebatur cum homo sciat se citò amissurum scientiam, & quod multis modis auferri potest, magis sibi erit miseria quàm felicitas: huic dicitur quod illiberalis hominis est non velle restituere quod gratis accepit, cum homo præsupponitur mortalis: Nam & purgatorium antiqui appellauerunt, cum ea lege receperit vt sciat naturæ concessurum, gratias Deo & naturæ aget, semperque erit paratus mori neque mortem timebit, cum vanus sit timor de ineuitabilibus, nihilque mali conspiciat in morte: Cùmque vltèriùs inferebatur quod hominis

conditio longe peior esset quocunque bruto; certe mea sententia hoc non est philosophicè dictum, cum opera bestialia quantumcumque quæta in suo genere supponantur inquieta in genere intellectualium, quis mallet esse lapidem vel ceruum longæ vitæ quàm hominē quantumcumque vilem? cum hoc quod vir prudens in quolibet statu & tempore potest ferre animum quietum, quamvis à tribulationibus corporeis vexaretur, imò vir sapiens magis eligeret se esse in extrema necessitate, & in maximis tribulationibus quàm esse insipientē, ignaum, & vitiosum in dispositione contraria; neque verum est quòd videns immensos labores, abdicationem à voluptatibus corporalibus, obscuram agnitionem de rebus, facilem amissionem acquisitionum, magis declinaret ad vitia & corporalia quàm moueretur ad acquirendam scientiam, si vir iste secundum rationem operatur; nam quantumcumque modicula particula scientiæ & virtutis præponenda est omnib. delectationib. corporalib. imò & regnis ipsi in quibus superabundant tyrannides & vitia: Quare primum argumentum non videtur cōvincere animam esse immortalē.

Ad secundum in quo inferebatur quòd posita mortalitate animæ, tunc nunquam debeamus eligere mortem: huic dicitur minimè illud sequi, verum magis oppositum, nam 3. Topic. dicitur de duob. malis minus est eligendū, & 3. ethic. electio est honorū, renuere autē malorū: Cum igitur in eligendo mortem pro patria, pro amicis, pro vitio evitādo maxima virtus acquiratur, alijque

multum proſit, cū naturaliter homines huiusmodi actum laudent, nihilque pretioſius & felicius ipſa virtute, ideo hoc maxime eligendum eſt: At ſcelus perpetrando communitati maximè nocet, quare & ſibi, cum ipſe pars communitatis ſit, in vitiumque incurrit, quo nihil infelicius, cum deſinat eſſe homo, vt Plato pluribus locis in de republica dicit: idèoque hoc habet rationē fugibilis: Ad adeptiōē etiā illius virtutis ſequitur felicitas, vel magna pars felicitatis, etſi parū duratura: At ad peccatum illud ſequitur miſeria: nam teſte Platone vitium miſeria eſt, & tandem mors, cum propter commiſſum ſcelus non ſequatur immortalitas, niſi fortè ſecundū infamiam & vituperium: ſed manifeſtum eſt minus malum eſſe primum quā ſecundum, neque magnum tempus viuere cum infamia eſt præponendum viuere tempore paruo cum laude, ſicut vita hominis quantumcunque brevis eſt præponenda vitæ beſtiæ quantumcunque diuturnæ: nam Ariſtoteles i. ethic. dicit vitam longæuam non præferendam eſſe vitæ breui, niſi cætera ſint paria: neque per ſe in tali caſu mors eligitur, cum nihil ſit, verū actus ſtudioſus, licet ad eum ſequatur mors: ſicut non comitendo vitium, non renuitur vita, cum in ſe ſit bona, ſed vitium renuitur, ad cuius perpetrationem ſequitur vita: Quòd verò dicitur de dicto in Phedone, Plato in de republica & in Critone ponit, quod ſicut vita cum infirmitate incurabili eſt renuenda, imò è viujs auferenda, ſic anima cum peccato extirpanda eſt, animaque ſi æterna

viueret in peccato summa miseria est, quando-
quidem ipsi animæ nihil deterius est ipso vitio:
verum illud dixit Plato quantum ad id quod de
facto contingeret, si enim homines non spera-
rent meliorem vitam post mortem, iniquissimo
animo sine dubio eam tolerarent, quia ignorant
excellentiā virtutis & ignobilitatem vitij: soli
enim philosophi & studiosi vt dicit Plato in de
republica, & Aristoteles 9. ethic. sciunt quan-
tam delectationem generent virtutes, & quantā
miseriam ignorantia & vitia: imò Socrates in
Apologia quam Plato scripsit dicit, siue animus
mortalis sit, siue immortalis, nihilominus con-
temnenda est mors: neque aliquo pacto decli-
nandum est à virtute quicquid accidat post mor-
tem: eodem quoque modo existimo interpretā-
da esse dicta D. Thomæ super symbolo Aposto-
lorum: non quod scelera sint potius committen-
da quam mors subeunda, si anima esset mortalis,
illud namque neque sapienter, neque theologicè
dici censeo: sed quod homines nō cognoscentes
excellentiā virtutis & fœditatem vitij, omne scē-
lus perpetrarent priusquam mori, quare ad re-
frænandum diras hominum cupiditates data est
spes præmij, & timor punitionis: quod etiam
supposita animorum mortalitate in aliquo ca-
su subeunda sit mors, manifestant multæ opera-
tiones bestiarum, in quibus non est dubium ani-
mas mortales esse, atque instinctu naturę duci:
refert namque Aristoteles 9. de hist. cap. 30. quod
Virgilius noster 4. Georg. cōmemorat, apes pro
sui ducis tutela & reipublicæ morti se exponere,

scribitque ibidem marē pro vxore tuenda mortem subire, refertque eodē lib. 9. de hist. cap. 37. camelū morſu defixo camelarium interemiſſe, quod ipſum dolo cum matre coire cōpuliſſet, equūque eodem modo deceptum idem ſcelus perpetrāſſe, at ubi rem cognouit ſe prācipitem interemiſſe; hæc autem cum natura ſiant, ſecundū rationem facta ſunt, quandoquidem ex Themiftij & Auerrois ſententia, natura dirigitur ab intelligentia non errante, non ergo & in homine hoc eſt contra rationem.

Ad tertium, cum inferebatur aut Deum non eſſe vniuerſorum gubernatorem, aut iniquum; huic dicitur neutrum ſequi, diciturque nullum malum eſſe eſſentialiter impunitum, neque bonum eſſentialiter irremuneratum eſſe: Pro quo ſciendum eſt, quod prāmium & pœna duplex eſt, quoddam eſſentiale & inſeparabile, quoddam verò accidentale & ſeparabile; prāmium eſſentiale virtutis eſt ipſamet virtus quæ hominem felicem facit, nihil enim maius natura humana habere poteſt ipſa virtute, quādoquidem ipſa ſola hominem ſecurum facit & remotum ab omni perturbatione; omnia namque in ſtudioſo conſonant, nihil timens, nihil ſperans, ſed in proſperis & aduerſis vniſormiter ſe habens, ſicut dicitur in fine 1. Ethic. & Plato in Critone dixit, viro bono neque viuo neque defuncto poteſt aliquod malum contingere: Ad oppoſitum modò de vitio, pœna namque vitioli eſt ipſum vitium, quo nihil miſerius, nihil infelicius eſſe poteſt; quòd autem peruerſa ſit vita vitioli, & maximè fugienda manifeſtat

Aristoteles 7. ethic. ubi ostendit quòd vitio-
 so omnia dissonant, nemini fidus, neque vigilās,
 neq; dormiens quiescit, diis corporis & animi
 cruciatibus angustiatur vita infelicissima, adeo
 quod nullus sapiens quantūcunque egenus, cor-
 pore infirmus, à bonis fortunæ destitut⁹ eligeret
 vitam tyranni, vel alicuius potentis vitiosi, mal-
 letq; sapiens in sua dispositione permanere; ita-
 que omnis virtuosus virtute sua & felicitate præ-
 miatur: Quare Aristoteles 30. particula proble-
 matū problemate 10. quo quærit cur in certami-
 nibus apponūtur præmia, at non in virtutibus &
 scientijs: Dicit hoc ideo cōtingere, quoniā virtus
 ipsa est sibi præmiū; nam cū præmiū debeat esse
 præstātius certamine, nihilque prudentia potest
 esse præstātius, sibiipsi igitur præmiū est: At con-
 trariū de vitio contingit, ideo nullus vitiosus im-
 punitus relinquitur, quandoquidē vitium ipsum
 sibi vitioso sit pœna, præmiū autem vel pœna ac-
 cidentales sunt quæ separari possunt, ut aurū vel
 dāna qualiacunque sint, & sic non omne bonum
 remuneratum est, & omne malum punitū, neque
 hoc incōuenit, cum accidentalia sunt: Scire tamē
 oportet hīc duos; primū quòd accidētale præmiū
 longè minor est pœna essentiali, pœna nāq; acci-
 dentalis est pœna damni, essentialis verò pœna
 culpæ, at pœna culpa longè minor est pœna es-
 sentiali, pœna nāmque accidentalis est pœna
 damni, essentialis verò pœna culpæ, at pœ-
 na culpæ longè deterior est pœna damni:
 quare nihil refert si quandoque essentialē re-
 linquatur dummodo essentialē remaneat: Se-

tundo adhuc sciendum & quod quando bonum accidentaliter præmiatur bonum essentialiter videtur diminui, neque remanet in sua perfectione, exempli causa aliquis virtuosè operatur sine spe præmij, alter verò cum spe præmij, actus secundi non ita virtuosus habetur sicut primi; quare magis essentialiter præmiatur qui non accidentaliter præmiatur eo qui accidentaliter præmiatur: eodē quoq; modo qui vitiosè operatur, & accidentaliter punitur, minus videtur puniri eo qui accidentaliter non punitur: nā pœna culpæ maior & deterior est pœna dāni, & cū pœna damni adiūgitur culpæ diminuit culpam; quare non punitus accidentaliter, magis punitur essentialiter eo qui accidentaliter punitur: testatur etiā super hoc quod scribit Laërtius de Aristotele, cum enim interrogaretur Aristoteles quid ex Philosophia acquisiuisset, respondit, quod vos spe præmiorū facitis, & timore pœnæ fugitis, ego ex amore & nobilitate virtutis facio, & ex vitij vituperio fugio; cur autem aliqui præmiantur, vel puniuntur accidentaliter, aliqui verò non, non est præsentis propositi.

Ad quartum, in quo dicebatur quòd ferè totum vniuersum esset deceptum, cum omnes leges ponant animā immortalem esse: Ad quod dicitur quod si totum nihil sit quàm suæ partes, veluti multi existimant, cum nullus sit homo qui non decipiatur vt dicit Plato in de Republica, non est peccatum illud concedere, imò necesse est concedere, aut quod totus mundus decipitur, aut saltem maior pars;

supposito quod sint tantum tres leges ; scilicet Christi, Moyſis , & Mahumethi : Aut igitur omnes ſunt falſæ , & ſic totus mundus eſt deceptus, aut ſaltem duæ earum, & ſic maior pars eſt decepta ; veruntamen ſcire oportet, quod vt dicunt Plato & Ariſtoteles, politicus eſt medicus animorum, propositumque politici eſt facere hominem magis ſtudioſum quam ſcientem ; modò ſecundum diuerſitatem hominum diuerſis ingenijs incedendum eſt ad hunc finem conſequendum : Aliqui enim ſunt homines ingenui , & bene inſtitutæ naturæ , adeo quod ad virtutem inducuntur ex ſola virtutis nobilitate, & à vitio retrahuntur ex ſola eius fœditate , & hi optimè diſpoſiti ſunt , licet perpauci ſunt : Aliqui verò ſunt minùs bene diſpoſiti, & hi præter nobilitatem virtutis , & fœditatem vitij, ex præmijs , laudibus, & honoribus , ex pœnis, vituperijs, & infamia ſtudioſa operantur , & vitia fugiunt , & hi in ſecundo gradu ſunt : Aliqui verò propter ſpem alicuius boni, & timorem pœnæ corporalis ſtudioſi efficiuntur ; quare vt talem virtutem conſequantur ſtatuunt politici vel aurum, vel dignitatem, vel aliquid tale ; vt vitia verò fugiant, ſtatuunt vel in pecunia, vel in honore, vel in corpore , ſeu mutilando membrum , ſeu occidendo puniri ; quidam verò ex ferocitate & peruerſitate naturæ nullo horum mouentur, vt quotidiana docet experientia ; ideo poſuerunt virtuoſis in alia vita præmia æterna, vitioſis verò æterna damna quæ maximè terrerēt,

maiorque pars hominum si bonum operatur, magis ex metu æterni damni quàm spe æterni boni operatur bonum, cum damna sint magis nobis cognita quàm illa bona æterna, & quoniam hoc vltimum ingenium omnibus hominibus potest prodesse cuiuscunque gradus sint, respiciens legislator pronitatem viarum ad malum, intendens communi bono, sanxit animam esse immortalem, non curans de veritate, sed tantum de probitate, vt inducat homines ad virtutem; neque accusandus est politicus, sicut namque medicus multa fingit, vt ægro sanitatem restituat; sic Politicus Apologos format, vt ciues rectificet; verum in his Apologis, vt dicit Auerroës in prologo 3. Phys. propriè neque est veritas, neque falsitas; sic etiam nutrices inducunt alumnos suos ad ea quæ pueris prodesse cognoscunt, quod si vir sanus esset, vel compos mentis, talibus figmentis neque medicus neque nutrix indigerent; quapropter si omnes homines essent in illo primo gradu enumerato, stante etiam animorum mortalitate stultiosi fierent, sed quasi nulli sunt illius dispositionis; quare alijs ingenijs incedere necesse fuit, neque hoc inconuenit, cum humana natura ferè tota sit immersa materiæ, parumque intellectus participet; vnde magis distat homo ab intelligentijs, quàm æger à sano, puer à viro, insipiens à sapiente, non itaque mirum est si talibus vtatur politicus.

In quinto autem principali duo tangebantur; vnum de his quæ viua sunt in sepulchris, alte-

rum verò de somnijs : Ad horum igitur primum dicitur primò quod multa inter historias connumerantur quæ tamen meræ fabulæ sunt: Dicitur secundo quod in locis sepulchrorum, vt in pluribus, aër est valde grossus, tum ex euaporatione cadauerum, tum ex frigiditate lapidum, ex multisque alijs, quæ aëris spissitudinem inducunt; verum vt 3. meteor cap. de Iride dicitur, talis aër faciliter recipit idola rerum circumstantium, sicut speculum recipit figuras; quare visa in aëre sic disposito à rudibus hominibus existimantur esse res quæ ibi videntur, sicut pueri aspicientes in speculo vel in aqua, credunt ea quæ in eis videntur verè esse ibi. Refert namque Aristoteles de quodam debilis visus aspiciente in nocte suam vmbra, ipsum existimasse esse virum insequentem ipsum, quo fit vt rudes homines propter tale accidens existiment illa esse animas defunctorum: Adiuuat etiam ad hæc imaginatio & vniuersalis fama; quare vt refert Aristoteles in secundo capite de somno & vigilia, multa ab existentibus in timore & alijs passionibus, esto quod vigilent, existimantur videri quæ tamen non sunt, sicut contingit ægrotantibus: Tertiò dicitur hoc multoties cōtingere propter illusiones & dolos maiorum Sacerdotum, vt legitur Dantelis vltimo de idolo Bel: multi enim Sacerdotes & templorum custodes quatuor virtutes Cardinales cōmutauerunt in ambitionem, auaritiam, gulam, & luxuriam, & ad hæc vitia omnia alia consequuntur, quare vt optatis perfruantur, his fraudibus

& fictionibus vtuntur, sicut tempestate nostra aliquando contigisse scimus: Quartò dicitur quod cum multæ Græcorum & Romanorum historiæ mirabilia referant; in ortu námque & occasu virorum memoria dignorum portenta apparuisse certissimū est, Suetonius enim Tranquillus in libro de duodecim Cæsaribus magna signa & per aues, & Deorum responsa, & multa alia narrat; non minùs Plutarchus in libro de vitis illustrium virorum; Virgilius quoque noster in fine i. Georg. hæc cecinit.

*Tempore quanquam illo tellus quoque, & æquora
Ponti,*

*Obscæntique canes, importunaque volucres,
Signa dabant, quoties cyclosum efferrere in agros
Vidimus undantem ruptis fornacibus Ætnam,
Flammarumque globos, liquefactaque volvere
saxa,*

*Armorum sonitum toto Germania cælo
Andy, insolitis tremuerunt motibus Alpes,
Vox quoque per lucos vulgò exaudita silentes
Ingens, & simulachra modis pallentia miris
Vasta sub obscurum noctis, pecudesque locuta
Infandum sistunt amnes, terræque debiscunt,
Et nocturnum illachrymat templis ebur, araque
sudant.*

Non minùs multa Lucanus commemorat. Machabæorum quoque secundo cap. 5. sic scribitur: Eodem tempore Antiochus secundam profectionem parauit in Ægyptum, contigit au-

tem per vniuersam Hierosolimorum ciuitatem videri diebus quadraginta per aëra equites discurrentes, auratas stolas habentes, & hastas quasi cohortes armatas, & cursus equorum per ordinem digestos, & congressiones fieri comunus, & scutorum motus, & galeatorum multitudinem gladijs districtis, & telorum iactus, & aureorum armorum splendorem, omnisque generis loricarum: quapropter omnes rogabant in bonum monstra conuerti, quare priores responsiones plenè euacuare non videntur: talia autem negare videtur esse magnæ pertinaciæ, & impudentiæ, quapropter aliter dicendum est: Concesso igitur quod non sint fictiones, aut illusiones, aut nostræ imaginationes, dicendum est quod Christiani, & quasi vniuersaliter omnes leges, & Plato, & Auicenna, & multi alij, ponunt hæc fieri vel à deo, vel per suos ministros quos Angelos appellamus si boni sint, si mali dæmones: verum est quoddam aliqua differentia est inter eos de qua nunc non est cura, isti que simpliciter concedunt animam humanam esse immortalem, & multiplicatam vt satis notum est, verum hoc manifestè repugnat dictis Aristotelis, cum nulla sit immaterialis substantia quæ orbem non moueat: namque 12. metaph. secundum numerum orbium ponit numerum intelligentiarum, neque est aliquis effectus hic inferior qui non reducatur secundum eum in primum motum, vt patet 8. phys. & 1. meteor. Amplius quia euidenti ratione naturali hoc videre meo monstrari non potest: quare non stabimus infra limites naturales, quod

les, quod tamen polliciti sumus à principio; ideo Alexander Aphrodiseus, vt refert D. Thomas in quæstione disputata de miraculis art. 3. & 10, in corpore quæstionis dixit hæc prouenire à substantijs separatis mediantibus corporibus cœlestibus, secundum virtutes stellarum, secundum coniunctiones & oppositiones earum; & verè si isti effectus conceduntur secundum Peripateticos, aliter dici non potest, cum mundus totus hic inferior illi superiori sit contiguus, vt inde omnis virtus gubernetur, sicut dicitur in principio meteororum; illud quoque non irrationabiliter videtur dictum; Etenim Alexander tenet Deum & intelligentias habere prouidentiam de istis inferioribus, quemadmodum ex eius sententia notat D. Thomas in expositione 56. tex. 2. de cœlo; Et hoc expressè Alexander ipse confitetur in libro de fato, quare pro temporum & locorum conditionibus istis inferioribus prouidet, & de regibus, & Prophetis, atque de alijs euentibus; Quod igitur talia apparuerunt aliquando, vt dictum est libro Machabæorum designabat bella futura sicut exitus denotauit, licet fortassis & illa cuitari secundum Alexandrum poterant, cum ponat in libro de fato voluntatem liberam; neque mirandum est si talia à corporibus cœlestibus figurari possunt, cum animata sint nobilissima anima, quæque omnia inferiora generent & gubernent: Consimile dicatur de his quæ Titus Lippius, Suetonius, Virgilius, Plutarchus, &

H

Lucanus referunt: Nam si præcedunt signa veris, ætatis, & aliorum temporum, vt manifestum est, quantò magis illæ intelligentiæ debent esse sollicitæ de natura humana: quod quidem clarissimum est videre, non enim memini me legisse vitam alicuius viri in quacunq; re, nisi in ortu & occasu multa præcesserint, unò in multis suis actibus: quodque Platonici genium siue dæmonem familiarem appellant, apud Peripateticos est eius genitura, quia talis natus est cum tali constellatione, ille verò cum alia, si sine illa multiplicatione dæmonum & geniorum saluare possumus superuacuum videtur illa ponere: cum hoc quòd illa etiam rationi non consonant: corpora ergo cœlestia secundum suas virtutes hæc mitanda producant pro mortalium vtilitate, & maxime hominum, cum Diuinitatis humana natura sit particeps; refert enim Aristoteles 3. de hist. cap. 20. quod in Lemno insula ex capri marinis quas geminas iuxta genitale gerebat tantum lactis emulxerunt vt colostrâ inde conficerent, cumque Dominus pecoris oraculum consuleret, responsum habuisse amplius incrementum peculij futurum, quod sic fore compertum est: Si itaque de pecoribus portenta dant, quantò magis de hominibus; verum D. Thomas pluribus subtilibus rationibus hanc opinionem impugnat; Primò quia hæc inordinatè fiunt, quæ verò à natura fiunt 2. & 8. phys. ordinatè fiunt; Secundò quia aliqui fiunt effectus in huiusmodi apparitionibus, qui non possunt reduci in corpus cœleste, vt locutiones &

præsertim futurorum, cum ista non possint fieri nisi ab habente intellectum, talia autem multoties sunt inanimata, aut intellectu carentia, ut quod bestia loquatur, vel in aëre voces humane sentiantur, vel aliquid tale: Tertiò quia quædam sunt quæ virtute corporum cœlestium fieri non possunt, ut quòd virgæ in serpentes vertantur, quare nulla videtur responsio: verùm mihi hæc conclusionem probare non videntur: Ad primum namque dicitur quòd imò talia ordinatè fiunt, & quoad tempora, & quoad loca, & per causas determinatas, quia multi Astrologi sciunt ista prædicere; Et de prodigijs futuris, de statuum mutationibus, & in locis determinatis, sicut visum est multoties, quod autem nobis videantur indeterminata, hoc ex nostra ignorantia prouenit: De secundo verò tam à D. Thoma magnificato nolo dicere quod miror, sed quod ego non rectè intelligo, huiusmodi enim effectus & locutiones secundùm ipsum fiunt ab intelligentijs quandoque bonis, quandoq; malis, & permissione diuina quandoque ab animabus humanis iam à corpore separatis; verùm omnia talia non sunt tunc formæ illorum corporum siue animatorum siue inanimatorum quæ sentiuntur sic loqui, sunt ergo tantùm motores, quare igitur intelligentiæ mouentes corpora cœlestia hoc facere non possunt? cū suis instrumentis, quæ tot ac tanta, faciunt psittacos, picas, coruos, merulas, &c. loqui; nō video cur tā apertè ipse hæc negat? præsertim quoniam secundùm ipsum quæst. 51. primæ part. summæ ponit Angelum siue

H ij

aliud sonum facere per corpus aëreum condensatum & figuratum; modò corpora celestia per suas virtutes & coniunctiones stellarum hæc & multò maiora faciunt, quia & animalia faciunt, & stupenda, vt patet in lapidibus & herbis; quare & hæc; & confirmatur quoniam Conciliator in expositione 26. problematis vndecimæ particulæ problema est, cur aliqui cum statim nascuntur loquuntur dicit, Haly Ebenragel de natiuitatibus hæc scribit, rex noster vocauit nos, eo quòd vna ex mulieribus suis peperit filium, & fuit ascendens 8. graduum libræ, terminus Mercurij, & in ipso fuerunt Iupiter, Venus, Mars, & Mercurius, & conuenit illic vna societas Astrologorum, quorum quilibet dixit suam opinionem, & ego tacui, tunc rex dixit mihi quid habes? cur non loqueris? Cui respondi, date mihi terminum trium dierum, quia si filius vester transierit tertium diem erit de eo miraculum magnum, & cum natus compleuit 24. horas incæpit loqui, & facere signa cum manu, & rex multum expauescit, vnde & ego dixi, possibile est quòd dicat aliquam Prophetiam, & aliquod miraculum, & tunc cum rege fuimus ad puerum, & dixit puer; Ego sum natus infortunatus, & natus sum ad indicandam amissionem regni Agedeir, & destructionem gentis Almanni, hic statim cecidit & mortuus est, & compertum est vt dixit; modò iste puer vel locutus est per spiritum, vel ex se: non primum quia Haly per Astrolo-

giam nesciuiſſet prædicere quæ dixit: Ergo ex ſe
ideſt ab intrinſeco, & non per cognitionem quã
habuit ab aliquo homine: Ergo ex virtute intell
igentiarum, & corporum cœleſtium, quare &
in alijs ſic poteſt contingere: Quod ſi dicatur,
omnis doctrina vel diſciplina ſit ex præexiſtente
cognitione, huic dicitur quòd iſta non eſt do
ctrina, vel diſciplina, neque cognitio propriè:
Cuius ſignum eſſe poteſt, quòd iſti vates cum
ſunt extra furorem nihil recordantur, inò ne
gant ſe illa dixiſſe, ſed ab impetu cœleſti mouen
tur, quare Plato in Menone, & in plerisque alijs
locis dicit, vates quamplurima vera nuntiant,
nihil tamen eorum quæ loquuntur intelligunt,
& lib. 30. problematum problemate 1. Sibillæ,
& Bacchæ, & omnes qui diuino ſpiraculo inſti
gari creduntur, in impetu inducuntur: Concilia
tórque ibi in expoſitione dicit: Ego audiui à fi
deli medico quod mulier quædam illiterata, dum
eſſet melancholica Latinum loquebatur con
gruum, qua ſanata euauit, quod eſſe non vide
tur niſi ex diſpoſitione corporis cū motu aſtro
rū: Ad tertium verò dicitur quod Peripatetici di
cerent illas eſſe illuſiones, ſicut multi faciunt per
alterationē aut medijs, aut oculi, aut ſi fuit verū,
non ſumus in terminis, quia ſecludimus miracu
la: Quod autem vlteriùs adiungebatur de ſom
nijs, nos illa maiora concedimus, Auerroës enim
qui non ponit animas multiplicari in capite de
diuinatione ſomniorum illud abundè concedit,
& Galenus qui animam putauit mortalem, inò
multo in medicina habita ſunt per ſomnia, ve

H iij

rùm hæc non arguunt animam immortalem simpliciter, sed Deos curare inferiora; quare & per signa in vigilia, & per somnia multa docent & prouident rebus humanis, sicut abundè ibi dicit Auerroës: quod autem dicitur de illis Arcadibus non est mirum, cum Plato 5. de repub. dicat, delinquentium in peregrinos Deus est ultor: quod autem de Pamphilo adducitur, ille Apologus est ad retrahendū ciues: Cur autē aliqui relinquuntur impuniti vel remunerati, aliqui verò è contrario, non est præsentis considerationis, & multa pulchra & difficilia ibi tangit Commentator, quæ non sunt pro nostra intentione.

Ad sextum verò de Dæmoniacis potest per hæc quæ dicta sunt responsio patere: Nam omnes tales, aut atra bili vexantur, aut extasim patiuntur, aut morti proximi, alienique ab humanis cogitationibus: quo fit vt quasi inanimati & irrationabiles fiant, propter quod motus cælestes recipere possunt, magisque aguntur & ducuntur ab impetu lymphatico, quam agant vel ducant: Cuius euidentissimum signum est, quoniam vt dicit Plato, & Aristoteles consentit, non intelligunt quæ dicunt: verum veluti bestię ab alio mouentur, vnde in prouerbio est pueros & stultos prophetizare, at sapientes & sui compotes ab huiusmodi alienos esse, neque de hoc aliquis mirari debet, quandoquidem Aristoteles 9. de hist. cap. 31. sic scribit, tempore quo apud Pharsala hospites medię periere, corui locis Athenarum Peloponesique defuerunt, quasi sensum haberent aliquē quo inter se rerū euenta

significarent & mouerentur, si enim corui talia futura ex cœlo senserunt, cur non & homines parùm à coruis distantes, cum minimè habeant de intellectu: consideret igitur sic obijciens bestias à quibus & augures sumunt sua præsagia: quòd verò augurandi ars non sit penitus vana, Græcorum & Romanorum declarant historie: instituitque Plato lib. de legibus, in ciuitate rectè ordinata augurandi artem non esse prætermittendam: Aristoteles quoque 1. de hist. cap. 16. & 9. eiusdem cap. 1. nonnulla commemorat de arte augurandi: Quod si aues, multaque ratione carentia indicare possunt ex cœlestiū impressione, cur non & homines illis similes: quod etiā firmatur, quoniam aliter Astrologi tam certè iudicare non possent, sicuti visum est nisi virtutes cœlestes in hæc inferiora imprimerent: quod si aliquando mentiri videntur, hoc est quoniam vel imperiti sunt, vel non rectè genituram acceperunt, vel ex libero arbitrio dominante cœlestibus illud contingit.

Ad septimum verò dicitur quòd minimè Aristoteles sensit animam post mortem remanere, verum oppositum: Et ad illud 1. Ethic. satis patet cum dicat neque prodesse, neque nocere eis: cum nihil sint, sed tantum existimationi quæ de eis habetur, quale esse Homerus in mente habet, tale esse enim & mortui habent: Ad illud 2. æconim. dicitur quod vel à Dijs mulieres illæ merite sunt in vita, non enim ibi dicitur post mortem, vel si post mortem intelligitur hoc quantum ad existimationem quæ habetur de eis, vel

II iij

vt inducat alias mulieres ad consimilia opera.

Ad octauum vero & vltimum in quo dicebatur viros impuros, & flagitiosos, suorumque scelerum conscios, asserere animas mortales, & sanctos iustos mortales; Ad hoc dicitur quod neque vniuersaliter viri impuri ponunt mortalitatem, neque vniuersaliter temperati immortalitatem: Nam manifestè videmus multos prauos homines credere legibus, verùm ex passionibus seduci, multos etiam viros sanctos & iustos scimus mortalitatem animarum posuisse: Plato namque 1. de repub. dicit Simonidem Poëtam virum diuinum & optimum fuisse, qui tamen eam mortalem asseuerat: Homerus quoque vt Aristoteles 2. de anima refert, existimauit sensum ab intellectu non differre: quæ autem fuerit Homeri dignitas quis ignorat? Hippoc. quoque & Galen. viri doctissimi & optimi huius perhibentur opinionis; Alexander Aphrodisæus, magnus Alfarabius, Abubacher, Auempace, ex nostratibus quoque Plinius Secundus, Seneca, immunerique alij hoc sensere; Seneca namque lib. 7. Epistolarum ad Lucilium epist. 54. quæ incipit, longum mihi comitatum dederat mala valetudo, manifestiùsque in de consolatione ad Martiam affirmat ipsam esse mortalem: multosque alios studiosos & viros doctissimos connumerat eiusdem opinionis fuisse; Et hoc ideo quoniam solam virtutem existimauerunt esse felicitatem, vitiùm verò miseriam, cæteraque alia bona neglexerunt, nisi quantùm virtuti deseruiunt, quæque virtuti obstant à seipsis eiecerunt; existimādūmq; est multos viros sensisse a-

animā mortalem, qui tamen scripserunt ipsam esse immortālē : sed hoc fecisse ex pronitate virorum ad malū, qui parū, aut nihil habent de intellectu, bonāq; animi non cognoscentes, nec amantes, tantū corporalibus incumbunt : Quare huiusmodi ingenijs necesse est eos sanare, sicut & medicus ad ægrum, & nutrix ad puerum ratione carentem se habent, per hæc (vt puto) & alia solui possunt: nam quod cōmuniter dicitur, si anima est mortalis, hoīno deberet totum se tradere voluptatibus corporalibus, omnia mala cōmittere ad sui vtilitatem, vanūmq; esset Deū colere, diuina honorare, preces ad Deum fundere, sacrificia facere, cæteraq; huius generis, satis responsio patet per ea quæ dicta sunt; nam cū naturaliter felicitas appetatur, & miseria fugiatur, & per dicta felicitas consistat in actu virtuoso, miseria verò in actu vitioso, cū ex tota mente Deū colere, diuina honorare, fundere ad Deū preces sacrificare, sint actus maximè virtuosī, ideo debemus totis viribus inniti ad acquisitionē istorum; è cōtrā verò furta, rapinæ, homicidia sunt vitia quæ faciunt transire hominē in bestiā, ideo ab ijs abstinere debemus, & animaduertas quòd studiosè operans, & non expectans præmiū aliud à virtute, longè virtuosius & magis ingenuè videtur operari quàm ille qui vltra virtutē præmiū aliquod expectat, quiq; fugit vitium ob turpitudinem vitij, non ob formidinē pænæ debitę pro vitio magis laudandus videtur, quàm qui euitat vitium propter timorem pænæ, iuxta illud, oderūt peccare boni virtutis amore, oderūt peccare mali formidinē pænæ : Quare perfectius asserentes

animam mortālē melius videntur saluare rationē virtutis quā̄m asserentes ipsam immortalē, spes namq; prēmij, & pœnē timor, videtur seruitutē quā̄dā importare, quē rationi virtutis cōtrariatur.

Pro complemento huius opinionis sciendū est, quòd quemadmodū docet Aristoteles in libris de gener. anim. natura gradatim procedit & ordinatē, ita quod non cōiungit immediatē extremū extremo, sed extremum medio, videmus enim inter herbas & arbores mediare virgulta, inter vegetabilia & animalia esse animata immobilia, vt ostrea, & cætera eius generis, & sic vlteriùs ascendendo, quod & beatus Dionysius cap. 7. de diuinis nominib. insinuat cum dicit quòd diuina sapientia coniungit fines superiorum principijs inferiorū; homo autem vt dictum est perfectissimum est animalium, quare cum inter materialia anima humana primum obtineat locum, coniungetur ergo cum immaterialibus mediāq; est inter materialia & immaterialia, medium verò cōparatum extremis dicitur alterū extremorū, quare immaterialibus cōparata potest dici materialis, & respectu materialium immaterialis, neque tantūm istas denominationes meretur, verūm & de proprietatibus extremorum participat; nam viride comparatū albo non solūm dicitur nigrū, verūm & congregat visum, sicut & nigrū, licet non tam intensè, quare & anima humana habet de proprietatibus intelligētiarū, & habet de proprietatibus omniū materialium; quo fit vt quando exercet opera cū quibus conuenit cum intelligentijs, dicatur diuina & transmutari in Deos,

quando verò exercet opera bestiarū dicitur trāsmutari in bestias, nā ex malitia dicitur, serpēs vel vulpes, ex crudelitate tigris &c. nihil enim est in mūdo quod ex aliqua proprietate non possit cōuenire ipsi homini; quapropter nō immeritò homo dictus est Microcōsmus seu paruus mundus; grande igitur miraculū quidam dixerunt esse hominem, cū totus mundus sit, & in vnāquāque naturam vertibilis, cum sibi data est potestas sequi quācūq; proprietatem rerū maluerit: Rectè igitur apologisauerunt Antiqui cū dixerunt aliquos homines esse factos Deos, aliquos leones, aliquos lupos, aliquos aquilas, aliquos pisces, aliquos plantas, aliquos saxa &c. cum aliqui homines insecuti sunt intellectū, aliqui sensum, aliqui vires vegetatiuæ &c. Quicumq; ergo præponūt voluptates corporales virtutibus moralibus, siue intellectiuis, magis faciūt bestiam quā Deum, qui diuitias magis aurum, quare illi bestiæ, isti insensati appellādi sunt: nō igitur existente anima mortali virtutes sunt spernendæ, & voluptatēs prosequendæ; nisi malit aliquis esse bestia quā homo, & insensatus quā sensatus seu cognoscēs: Scire tamen oportet quòd quantūaūq; homo sic de materiali & immateriali participet, tamē propriè dicitur immateriali participare, quia multū deficit ab immaterialitate, sed non propriè dicitur brutis & vegetabilibus participare, verū eā cōtinere, nam infra immaterialia est & supra materialia, quapropter non potest ad perfectionem immaterialium deuenire, vnde neque dij appellati sunt, sed diui vel diuini; verū nō edum po-

test æquare se homo bestia, imò bestiam superare, nam quidam homines longe crudeliores quàmque bestia existunt, dicente Aristotele 7. ethic. malus homo decies millies peior est bestia, & sicut dictum est de crudelitate, ita dicatur de reliquis vitijs: Cum itaque tam fœdum sit vitium, tam iniqua sit hominis vitiosi vita, è contra verò de virtute, quisigitur existente etiam anima mortali magis eligeret vitium quàm virtutem, nisi mallet esse bestia seu deterior bestia quàm homo, quare &c.

In quo ponitur vltima conclusio in hac materia, quę sententia mea videtur indubiè sustinenda.

CAPVT XV. & vltimum.

HIs itaque sic se habentibus, mihi (salua seniori sententia) in hac materia dicendū videtur, quòd quæstio de immortalitate animæ est neutrū problema, sicut etiā de mundi æternitate: mihi namque videtur quòd nullæ rationes naturales adduci possunt cogentes animam esse immortalem, minúsque probantes animam esse mortalem, sicut quamplures Doctores tenentes eam immortalem declarant; Quare nolui ponere responsiones ad alteram partem, cum alij ponant; Et præcipuè D. Thomas luculenter, copiosè & grauiter; quapropter dicemus sicut Plato 1. de Legibus certificare de aliquo cum multi ambigunt solius est Dei; cum itaque tam illustres

viri inter se ambigant, nisi per Deum hoc certi-
 ficari posse existimo: nō videtur autē esse decēs,
 neq; expediens hominē tali certitudine carere, si
 enim in hoc ambigeret incertas & sine fine ali-
 quo actiones haberet, quandoquidē sine ignoto,
 & quæ ad ipsum finē sunt, ignota esse necesse est;
 vnde si anima est immortalis, terrena despicienda
 sunt, & æterna prosequenda: At si mortalis exi-
 stat, contrarius modus prosequendus est, quòd si
 alia ab homine suos fines determinatos habent,
 quātò magis homo ipse, cū homo perfectissimus
 mortalium sit, solusq; vt Plato in de Republica
 dicit, Deum colat, & iustitiam; quapropter dico
 quòd ante donū vel aduentū gratiæ, multifariam
 per Prophetas, & bona supernaturalia hanc quæ-
 stionē Deus terminauit, vt manifestē per vetus
 Testamentū est videre; nouissimē autē per filiū,
 quem constituit hæredē vniuersorum, per quem
 fecit & sæcula eam quæstionē dilucidauit, sicut
 scribit Apostolus epist. ad Hebræos: Quòd autē
 ille sit verē Dei filius, verus deus, & verus homo,
 apertissimē & sine dubio lumē Christiani nomi-
 nis D. Thomas in primo contra Gentiles cap. 6.
 declarat, quæ Ioannes Scotus omnium sententia
 mea subtilissim⁹, virq; in primis Religiosissimus
 ad numerū octonariū redigens enumerat in pro-
 logo libri sententiarum; etenim tam apertē illa
 octo illud declarāt, vt nisi mēte priuatus aut per-
 tinax negare posset: Cū igitur ille verus sit Deus,
 ipse solus verē est lux per quā omnia vidētur, vt
 Ioānis 1. ipseq; etiā sol⁹ est veritas per quā cetera
 vera sunt, vt Ioannis 14. ego sum via, veritas, &

vita: verum cum ipse manifestauerit verbo, & opere animam esse immortalē, verbo quidem cum malis minatur ignem aeternū, bonis verò vitam aeternam promittit, dicit enim venite benedicti patris mei &c. & subsequitur, ite maledicti in ignē aeternū &c. opere verò cum tertia die resurrexit; verum quantò lux distat à lucido, & veritas à vero, & quantò causa infinita est potior effectu finito, tantò efficacius hoc demonstrat immortalitatem animæ; quare si quæ rationes probare videntur mortalitatē animæ, sunt falsæ & apparentes, cum prima lux, & prima veritas ostēdant oppositum, si quæ verò videntur probare eius immortalitatē, veræ quidē sunt & lucidæ, sed nō lux & veritas; quare hæc sola via inconcussa & stabilis est, cæteræ vero sunt fluctuantes: Præterea omnis ars debet per propria & conuenientia arti procedere, aliter peccat & inartificiosè procedit, vt 1. post. & ethic. dicit Aristoteles: sed animam esse immortalem est articulus fidei, vt patet per symbolū Apostolorum & Athanasij: Ergo probari debet per propria fidei, mediū autem cui inuitur fides est reuelatio, & scriptura Canonica: ergo tantum verè & propriè per hæc habet probari: Cæteræ vero rationes sunt extraneæ, innitunturque medio non probanti quod intenditur: nō igitur mirū est si philosophi inter se discordāt de immortalitate animæ, cū argumētis extraneis conclusioni, & fallacibus innitantur: At omnes Christicolæ concordēs cū per propria & infallibilia procedunt, cū hæc nō possint esse nisi secundum vnum modū: Amplius qui infirmus est sanitatē procurat, nemo autē sibi ipsi sit medicus, quon-

ziā & 3. polit. dicitur, in proprijs nemo rectè iudicat, cū in passionibus sit, quærat igitur aliū, bonus aut ē medicus debet esse peritus in arte, & bonorū morū, quoniā neq; primū sine secundo neq; secūdū sine primo sufficiūt: sed (vt inquit Plato) veluti distēperātia in humorib. est ægritudo corporis, sic ignorantia est animi ægritudo, ignorans igitur an anima sit mortalis necne, scientem & bonum quærat: duo autē genera hominū profitentur hoc scire, scilicet infideles, & Christicolæ, multi verò infidelium viri doctissimi extiterunt, at omnes ferè maculatę vitæ, vt alia taceam saltē inanis gloriæ, solūmq; naturalia quæ obscurā & infirmam cognitionem faciunt intellexerunt: At multi Christicolæ ni fallor nō minus illis in naturalibus cognouere, vt Paulus, Dionysius, Basilus, Athanasius, Origenes, duo Gregorij Nazianzenus & Nyssenus, Augustinus, Hieronymus, Ambrosius &c. præterquam quod naturalium cognitionem, diuinorum etiam habuerunt, quæ vt ait Hieronymus, hoc doctus Plato nesciuit, hoc eloquens Demosthenes ignorauit, vitamque immaculatissimam duxerunt: verū quis nisi insanus magis crederet infidelib⁹ sic dispositis, quā Christicolis tam bene dotatis? mihi que illud firmant fidem facit, quod Augustinus mea sententia nulli in doctrina secund⁹, etenim minorē Platone & Aristotele non existimo, Christiani nominis primo inimicus, tã integerrimæ vitæ factus, in fine de ciuitate, Dei scribit tot se occulta fide vidisse miracula, quæ intemeratam, inuiolabilem & firmissimā fidē ostendunt, Greg. quoq; Papa cui-

uis in doctrina & sanctitate cōferendus, tot & tāta in dialogis adducit, vt omnis prorsus ambiguitas remoueatur, quare indubiē ipsam immortalē esse asserendum est: verūm nō ea via incedēdum est quā huius sæculi sapientes incesserunt, qui cū sapiētes se dixerūt stulti facti sunt, quisquis enim hac via procedet vt existimo sēper incert⁹ & vagus fluctuabit, vnde credo quod quantuncūque Plato tot ac tāta egregiē scripserit de animorum immortalitate, firmitatē tamē nō habuisse existimo, quod coniecturo ex fine Apologiæ, ibi .n. videtur sub dubio relinquere: In timæo etiā cū de hoc sermonē habiturus esset dixit, satis sibi esse si in re tā difficili verisimilia diceret, quare omnia eius dicta cōferendo, mihi videtur magis opinando quā asserēdo loqui, conatusq; eius est ciues bonos facere non autē doctos: verūm vt dicit D. Thomas secunda secundæ art. 3. quæst. 1. cū opinione falsa stat actus moralis: At via fidelium incedentes, stabiles, & inconcussi permagent, quod diuitiarum, honorum, voluptatum, & omnium mundanorū contēptus declarat, & demū corona Martyrij quā ardentissimē affectabant, affectatāque cum sūmma voluptate cōsequebantur.

Hæc itaque sunt quæ mihi in hac materia dicenda videntur: Semper tamen & in hoc, & in alijs subijciendo sedi Apostolicæ: Quare &c.

Finis impositus est huic tractatui per me Petrum filium Ioannis Nicolai Pōponatij de Mantua, die 24. mensis Septemb. Anno Christi 1516. Bononiæ. Anno 4. Pontificatus Leonis 10. ad laudem indiuiduæ Trinitatis, &c.